

MALIKA

Iesu Valana 'Atumaina Malika 'ana kilukiluma.

Malikanina tamu 'ana wagava Ioni, kumanina nagamidiotoga Vala 'Atumaina faifaina i kiluma. Malika kebu Iesu yana tovetutuyama 12 'adi 'aila'a 'wainega, bega to'asetai 'ifwaidi i vo, Iesu ifufuna Malika i nogaya-'ewai Fita yana lau'age 'wainega bega i kiluma.” Siwe fai Malika Ielusalema nageneye i taulai bega tauniotogina Iesu yana folova matatabuna i 'isedi. We'e Malika 14:51-52 ta na lu'iwawaiga ta na 'iseni voke 'asa'aiana taunina Malika. Mulieta i veto'aivaita Paulo wata Banabasa yadi folova 'waidie.

Malika nuanuana me Loma kumanidiavo 'awalawa fueidi i veimeyediga Iesu valana i na 'asetai. We'e me Lomanidi fai nani toketokedi wata 'ai'aiwabu nuadi i 'ewadi, Malika yana buki nageneye i vo, Iesu 'aiseotogina toketokena ma yana veimea bega me Loma wata tomotoga fueda ta na 'asetai taunina mogitana Yaubada Natuna.” Iesu 'eba nuavogana wata 'eba nua'ewa fueidi i 'idewadi faifaidi Malika i toke i veifufu we'e yana ve faifaidi sai'afo. We'e tamu nani faifaina i veifufuga, Iesu Seitani i vetoketoke'iaweni faifaina wata taunina tomotoga 'ada to'ita'ita'i.

Buki 'ana 'eba ve'a'ava 'waineye side [] tugu-sanina i 'eno'eno. Tomotoga 'ifwaidi i vo, Tamu tomogo Malika 'ana kilukiluma i lusaweni.”

Ioni i veifufu Iesu yana mai faifaina.

1-2 ✧ Iesu Keliso, Yaubada Natuna Valana 'Atumaina. Basenadi Yaubada yana tolu'ivona 'ana wagava Aisea i kilumi Yaubada yana Vona Natuna faifaina. Yaubada Natuna i voneni i vo,

A na vonemu. Yaku tomata'aulele a na vetunei i na kumeta yamu 'eda i na vusia.”

3 ✧ Sali'avu'avuye tamu tomogo i vegolegole i vo, 'Aueva yana 'eda 'wa na vusia wata 'wa na sivetonovi yana 'eba nago.”

4 ✧ Ifufunina 'Atumaina side bani'odi i velamuyedi. Tutuyanina Ioni i le'wa vonanina Aisea i kilumiga 'ana mogitana i souyeni. Sali'avu'avuye Ioni tomotoga i lulu'ageyedi wata i bafitaisodi i vo, 'Wa na nuavilami yami sakona 'wa na vedumwe'ubu'ubusedi bega a na bafitaisomi, wata Yaubada yami sakona i na nuatavunidi.”

5 'Awalawa Iudia matatabuna 'wainega wata Ielusalemayega tomotoga fueidi Ioni valana i nogai bega i nagoi 'waineye. Tutuyanina Ioni bonana i nogai, 'aitamogana 'aitamogana yadi sakona i lu'ivona i 'a'avana Ioni i bafitaisodi Ufa Iolidani 'waineye.

6 Ioni 'ana kaleko sakoidi 'aisaya kameli vutuvutudiega i 'idewadi, we'e bulumakau bunudi 'ana wa'ila, sali'avu'avuye i 'ani'ani limwana wata mai'awa. 7 Ioni i lau'age tomotoga 'waidie i vo, Kumanina mulikuye i mimaiga toketokeotogina yau kebu bani'odiga, kebu i da lubwaineku 'waineye a na vetofolova, fai taunina bwaikina bega a bunumayaga. 8 ✧ Yau ufayega

✧ 1:1-2: Mal 3:1; Luk 7:27 ✧ 1:3: Ais 40:3 ✧ 1:4: Fol 13:34; Luk 1:77 ✧ 1:8: Fol 1:5

a bafitaisomi we'e taunina i na bafitaisomi 'Anu'anunu 'Atumainega.”

Iesu yana souyagi.

⁹ Tutuyanina 'waineye Iesu i tauya 'atamana Nasalediega, 'awalawa Galili nageneye i nago Ioni 'waineye i na bafitaiso Ufa Iolidani 'waineye.

¹⁰ ✧ Tutuyanina ufayega Iesu i lakalakama i 'iseni abama i 'anikililia Yaubada 'Anu'anununa yana yaveobu Iesu 'waineye bani'odi bunebune.

¹¹ ✧ Bona i nogai abamega i vo, 'Omu natuku nuafouku a nuakalikiemu, faifaimu a sosoana bwaikina.”

¹² Iesu i bafitaiso i 'a'avana nika Yaubada 'Anu'anununa i voneni i nago sali'avu'avuye.

¹³ ✧ Bei 'aiata 40 nagedie i miamia, yaiaina yadi to'edakumeta Seitani, i mai i vevetalaimimili nu-anuana Iesu i na sakona. 'Aisaya walawala'ai taiadi i miamia siwe anelose i 'i'isave'avini.

Iesu nuanuana toyaubani.

¹⁴⁻¹⁵ ✧ Kini Elodi Ioni Tobafitaiso i 'ive'avini vanuga 'eba yogona 'waineye i yatoi, mulieta Iesu i vilai i nago 'awalawa Galili. Yaubada Valana 'Atumaina i lulu'ageyeni i vo, Yaubada yana tutuya i le'wa sai'afoga yana veimea i na souyeni 'waimie. Yami sakona 'wa na bailedi, Vala 'Atumaina 'wa na vetumaganeni.”

¹⁶ Tamu 'aiata Iesu i balabalaga Lavu Galili bale-baleamo tomotoga 'adi 'ailuga i 'isedi, Saimoni ma taina Anidulu vuatayega igana i 'ona'onadi fai taunidi toyaubani. ¹⁷ Iesu i vonedi i vo, We'e yaubaninina 'wa na baileni 'wa na maia 'wa na

✧ **1:10:** Ion 1:32 ✧ **1:11:** Same 2:7 ✧ **1:13:** Ibu 4:15

✧ **1:14-15:** Mad 3:2

vetovetutuyama 'waikuye, yau yaubani tamu a na vemi bega tomotoga 'wa na 'ona'onadi 'wa na mimaiedi Yaubada 'waineye.” ¹⁸ ✨Nika Sai-
moni wata Anidulu vualalalakana i 'iawedi Iesu i yogo'waili.

¹⁹ Sai'afo i vaganago wata Sebedi ma natunavo i 'isedi Iemesa wata Ioni yadi wakeye yadi vuata i agiagilidi. ²⁰ Tutuyanina Iesu i 'isedi i goledi i vo, 'Wa maia,” nika tamadi ma yana tofolovavo i 'iawedi Iesu taiadi i nagoi Kafaneomi.

Tomogo yaiaina i ageiga i ve'atumai.

²¹ Iesu ma enavo i miamiani Kafaneomi, mulieta me Diu yadi 'Aiata Veawai* 'waineye Iesu i luku 'eba miava'auta 'waineye, bei i ve. ²² ✨Tomotoga nuadi i voganidi fai ma yana veimea i veve 'waidie kebu bani'odi yadi ve'etoboda 'adi tovevo.

²³ Tutuyanina Iesu i veve, tamu tomogo yaiaina sakoina i ageiga i mai 'eba miava'auta 'waineye, Iesu yana vona i noganogaya. ²⁴ ✨Bei ma 'ana labilabina i vevebwabwau i vo, Iesu tomogo Nasaledi, 'u bailema 'ima kebu nuanuama 'omu. Voke nuanuamu 'u na leoma? A 'asetamu, 'omu Yaubada Natuna Magemagetamu.” ²⁵ Iesu ya-
iaina i talabodeni i vo, 'U ve'wada, 'u 'awa'a'imu tomogo 'wainega.” ²⁶ Yaiainanina tomogo i toke i fetoi i vebwabwau nika i 'awa'a'ia.

²⁷ Tomotoga i 'iseni nuadi i 'ewai i veveaku-
tolieni i vo, Emavo, ava'ai tomogoga? Yana ve

✨ **1:18:** Mad 19:27 * **1:21:** 'Ana wagava Sabati, bonada Kaiwekesi. ✨ **1:22:** Mad 7:28 ✨ **1:24:** Mak 5:7; Ion 6:69

'ivauna wata ma yana veimea yaiaina i tata-labodedi i vevematayakayaka.” ²⁸ Tomotoga fuedi i lu'ivoneyeni bega valana 'awalawa Galili matatabuna i 'asetai.

Iesu i 'ive'atumaidi tovinga.

²⁹ 'Eba miava'auta 'wainega Iesu ma enavo i souyedi tonovidi i nagoi Saimoni wata Anidulu yadi vanuge. Iemesa wata Ioni taiadi i nagoi. ³⁰ Saimoni yana vavine inadi i viga tomogodi i luyauyauta i 'eno'eno 'ivie. Tutuyanina Iesu i le'wa i veifufu 'waineye yadi viga faifaina. ³¹ Iesu i luku, nimadie i 'abi i sivetovoidi nika 'adi viga i 'a'ava, ma fuedie 'adi'adi i 'idewadewa.

³²⁻³³ ✧ Inala 'akonadi i obu i lavilavia tomotoga ediavo yaiaina i agediga wata tovinga i miedi Iesu 'waineye, wata tomotoga matatabudi i maia 'atamana bwaikinega i va'auta vanuga 'awaneye. ³⁴ ✧ Tovinga 'adi viga tulina tulina Iesu i 'ive'atumaidi wata i vona yaiaina fuedi i 'awa'a'idi. Yaiainanidi i talabodedi kebu i na lu'ivona fai 'akonadi i 'asetai Iesu taunina Yaubada Natuna.

Iesu 'aiseneye i velu'ui.

³⁵ ✧ 'Awa'awaiogose bola kebu i da magetaiga Iesu i tovoi vanugayega i souyeni i nago tamu 'awasasa kebu tomotoginaga 'waineye, 'aiseneye i velu'ui. ³⁶ Mulieta Saimoni ma enavo i 'isa Iesu i 'isa'avai i nagoi i lualeni. ³⁷ Tutuyanina i veluagai i voneni i vo, Tomotoga fuedi i lulualemu nuanuadi 'omu.” ³⁸ Iesu i vonedi i vo, Ta na

✧ **1:32-33:** Mad 4:24 ✧ **1:34:** Mak 3:11-12; Fol 16:17-18

✧ **1:35:** Mad 14:23; Luk 5:16

nagoi mali 'atamana 'waidie bei wata a na lau'age, faifainanina a mai.” ³⁹ ✧Bega i nagoi 'awalawa Galili matatabuna 'waineye i lalau'age yadi 'eba miava'auta nagedie wata i vonavona yaiaina tomotoga i agediga i 'a'awa'a'idi.

Iesu tomogo waiwaiseselina i 'ive'atumaia.

⁴⁰ Tamu tomogo waiwaiseselina i mai Iesu 'waineye ma yana ve'ililibu i 'odu i velu'ui 'aivaita faifaina i vo, 'Ai'edi nuanuamu, 'amu fata 'u na 'ive'atumaiku.” ⁴¹ Iesu i nuavita tomogonina faifaina bega i 'abitonovi i voneni i vo, Fai bani'odi, nuanuaku, 'u ve'atumai.” ⁴² Nika tomogonina 'ana viga i 'a'ava i ve'atumai.

⁴³⁻⁴⁴ ✧Bega Iesu i toke i voneni i vo, Kebu tamu aitoi 'waineye 'u na lu'ivonaga, nuanuaku tonovimu 'u na nago tovelomu 'waineye, nagami i na 'isemu. 'Aisaya 'u na veleni i na kabuni Yaubada 'waineye faifaimu, bani'odi basenadiotoga Mosese i voneyeniga Yaubada yana Buki 'waineye towaiwaisesela i ve'atumaiga faifaina. Tovelomunina i na 'isemu i na ve'awamogitana 'akonadi 'u ve'atumai wata bani'odi mali tomotoga i na 'asetai.” ⁴⁵ ✧Siwe tomogonina i nago 'atamana 'waidie i lu'ivo'ivona bega 'aila'a i maia Iesu 'waineye kebu 'ana fata i na folova, begaidi 'atamana bwaikidi i bailedi i nago 'awasasa 'ifwaidi kebu tomotogidi 'waidie. Siwe wata tomotoga i nagoi 'waineye 'awalawa fuedi 'waidiega.

✧ 1:39: Mad 4:23-25 ✧ 1:43-44: Vei 14:1-4 ✧ 1:45: Mak 7:36

2

Iesu tomogo bwalobwalokona i 'ive'atumaia.

¹⁻² 'Aiata 'ifwaidi i 'a'ava, mulieta Iesu i vilai i nago Kafaneomi i luku vanuge. Tomotoga fuedi valana i nogai bega i va'auta vanuga i veadagi kebu tamu 'awasasaga wata bani'odi vanuga 'awana, mulieta Iesu Yaubada yana Vona i lu'ageyeni 'waidie. ³ Tutuyanina Iesu i lalau'age, tomotoga 'ifwaidi i maia 'adi ⁴ iadi bwalobwalokona ma 'evo'evona i mieni Iesu 'waineye. ⁴ I le'weni 'aila'a bwaikina i 'isedi kebu 'adi fata i na lukuga, begaidi i laka vanuga 'ubunega ava'aibe bei Iesu i tovotovoi, 'ana saila'a 'ifwaidi i 'ewadi bega 'anibwekaneamo ma 'evo'evona i ve'ioyoi i obu. ⁵ ✧ Iesu i 'iseni i 'asetai ma yadi vetumagana bega tomogo bwalobwalokona i voneni i vo, Natuku, yamu sakona a nuatavunidi.”

⁶⁻⁷ ✧ Ifwaidi ve'etoboda 'adi tovevo i nogai Iesu yana vona nuadiege i vo, Iesu awale Yaubada i vona-uvi'agali? Kebu tamu aitoi 'ana fata sakona i na nuatavunidi, Yaubada 'aisena 'ana fata.” ⁸ Iesu 'akonadi i 'asetai yadi nuanua begaidi i vonedi i vo, Awale bani'odi 'wa nuanuayedi? ⁹⁻¹⁰ Yau a vetomotogaotoga ma yaku veimea fwayefwayeye bega 'aku fata tomotoga yadi sakona a na nuatavunidi. Tomotoga 'adi 'ive'atumai vitana fai 'ai'edi a na vona siwe kebu i na ve'atumaiga, 'wa na 'asetai kebu ma yaku veimea a vona 'avo'avovo. Siwe tovinga de'e a na 'ive'atumaia 'wa na 'iseni bega 'wa na 'asetai kebu a da vona 'avo'avovo 'aku fata sakona a na nuatavunidi.”

✧ **2:5:** Luk 7:48 ✧ **2:6-7:** 1 Ion 1:9; Ais 43:25

11 Bega Iesu tomogo bwalobwalokona i voneni i vo, 'U tovoi, 'amu 'evo'evo 'u evai 'u nago yamu vanuge.” 12 ✨I tovoi fuedi i 'iseni yana sita i 'ewai i tauya. Matatabudi nuadi i voganidi bega Yaubada i subiai i vo, Kebu tamu tutuya bani'odi ta da 'iseniga.”

Iesu Livai i golemi.

13 Iesu wata i vila-vaitugani i nago lavuye. 'Aila'a bwaikina i maia 'waineye, bei wata i ve. 14 Akonadi yana ve i 'a'ava, i nunagoga takesi 'ana tolaugogona i 'iseni 'eba takesi 'waineye i miamia, 'ana wagava Livai, Alefasi natuna. Iesu i voneni i vo, Taiadi ta na nago, yaku tovetutuyama.” Nika Livai i tovoi Iesu mulineye i nago.

15 Mulieta Iesu ma yana tovetutuyamavo i 'ani'ani Livai yana vanuge, 'ifwaidi tolaugogona wata 'ifwaidi tosakona taiadi i 'ani'ani. Tomotoganidi Iesu i yoyogo'wai'waili. 16 ✨'Ifwaidi ve'etoboda 'adi tovevo siwe taunidi Diu totafalolo Falisi i 'iseni i nagoi Iesu yana tove tutuyamavo 'waidie i velutoliedi i vo, Awale tolaugogona vivinagodi wata tosakona taiadi i 'ani'ani, kebu 'ana 'isa 'atumainaga.”

17 ✨Iesu i nogai i vona-awatabai 'waidie i vo, Egavo 'atumaidi kebu nuanuadi viga 'adi to'ive'atumai, 'aisedi tovigga mogitana. Wata bani'odi, yau a maiga kebu taunidi i awave'atumaiediga faifaidi, a maiga wata tosakona a na 'ita'ita'iedi.”

Ve'udigana 'ana 'asetu.

✨ 2:12: Mad 9:33 ✨ 2:16: Mad 11:19; Luk 15:1-2 ✨ 2:17: Luk 19:10; 1 Tim 1:15

18 Ioni Tobafitaiso yana tovetutuyamavo wata totafalolo Falisi i veve'udigana 'ani matatabuna bega yadi velu'ui Yaubada 'waineye i na ve-toketoke. Tomotoga 'ifwaidi i maia Iesu i velu-tolieni i vo, Awale Ioni yana tovetutuyamavo wata Falisi i veve'udigana i na velu'ui faifaina, we'e yamu tovetutuyamavo kebu i da ve'udiganaga?"
 19 ✧ Iesu yadi vona i tutuli, taunina faifaina i vona-awatabai i vo, Tonagi yana sosoana 'waineye kebu tamu aitoi 'ana fata i na talabodedi bega enavo 'ani'ani i na baileni. 20 We'e tamu 'aiata tomotoga 'ifwaidi i na maia tonaginina i na 'ive'avini i na naweni i lubwainedi enavonidi ma yadi nuavita i na ve'udigana."

Sauluva tuatuaina wata Iesu yana ve 'ivauna 'adi luwanawana faifaina.

21 ✧ Wata Iesu i awatalatutula 'waidie yana ve sauluva 'ivauna faifaina wata me Diu yadi sauluva tuatuaina 'adi luwanawana faifaidi i vo, Kaleko tuatuaina i na 'anilabu'i we'e 'ivaunega ta na bwadia kebu i da lubwaineniga. Fai bola ta na lekoai bwadi 'ivauna i na vesiai bega i na vefato'ai'ai tuatuaina i na 'ivesakoi."

22 Wata bani'odi oine 'ana 'eba iwaga 'aisaya bunudiega faifaina Iesu i vona i vo, 'Ai'edi oine 'ivauna 'eba iwaga tuatuaina 'waineye i na iwagi i na yuveduai, i na iwaga 'ana ve'amubwadodo fai totolina wata 'eba iwaga 'akonadi i sako. We'e 'ai'edi oine 'ivauna wata 'eba iwaga 'ivauna nika bikabikana i na lubwaineni kebu i na yuveduai 'ailugana 'atumaidi."

Iesu i ve 'Aiata Veawai faifaina.

23 ✧ Tamu 'Aiata Veawai 'waineye, Iesu ma yana tovetutuyamavo i nunagoi bakula 'waineamo, yana tovetutuyamavo i lase bega vuaga i kadidi i 'ani, fai 'akonadi tonibakula i tauyedi. 24 We'e 'ifwaidi Diu totafalolo Falisi i 'isedi Iesu i voneni i vo, Awale? Me Diu yada ve'etoboda yamu tovetutuyamavo i geugeuya vuaga i kadikadidi bani'odi folova yada 'Aiata Veawai 'waineye. 25 ✧ Iesu Falisi yadi vona i tutuli i vo, 'Wa da vo kebu bani'odi Yaubada yana Buki 'wa da lu'iawawaiga, basenadiotoga Kini Devida ma enavo i lase faifaina. 26 I luku Yaubada yana vanuga 'eba velu'ui nageneye, beledi tamu Yaubada 'ana 'anivelena Abiada tovelomu bwaikina i veledi ma enavo i 'ani. De'e wata yada ve'etoboda kebu tamu aitoi 'ana fata beledinina i na 'ania tovelomu 'aisedi faifaidi, i 'ania kebu i da sakona fai i lase. 27 ✧ Yaubada 'Aiata Veawai i yatoi tomotoga 'ada 'aivaita ta na veawai faifaina, kebu i da yatoi bega 'aiatanina i na veimeyeda. 28 Yau a vetomotogaotoga tomia fwayafwaya matatabuna 'adi To'isave'avina, wata 'Aiata Veawai 'ana Toveimea, 'aku fata 'aiatanina 'waineye tomotoga yadi sauluva faifaidi a na veimeyedi.”

3

Tomogo nimana 'okana.

1 Iesu i vilai i nago 'eba miava'auta 'waineye bei tamu tomogo ma nima'okana i miamiana. 2 ✧ Diu

✧ 2:23: VeL 23:25 ✧ 2:25: 1 Sam 21:1-6 ✧ 2:27: VeL 5:14

✧ 3:2: Luk 13:14

totafalolo 'ifwaidi i maia Iesu i vemata'i'i'ieni nu-anuadi i na vevitai tamu sakona faifaina i vo, 'Ai'edi tamu aitoi 'Aiata Veawai 'waineye i na 'ive'atumaiga yada ve'etoboda i na geuya ta na yatoi 'eba vonayavuga 'waineye.”³ Iesu i vona tomogo ma nima'okana 'waineye i vo, 'U mai side bei 'aila'a matadie.”⁴ Mulieta Iesu i vona tomotoganidi 'waidie i vo, 'Wa da nuani yada ve'etoboda 'Aiata Veawai 'waineye 'ada fata tomotoga ta na 'ivaisedi 'alo ta na vesauluva sakoina 'waidie, 'ai'edi tamu tomogo sai'afoga i na wafa ta na 'ivaiseni 'alo ta na luvewafaimo?” Nika kebu bonana i da tutuliga.

⁵ ✧ Iesu i nuavita fai taunidi kebu nuanuadi tomogo ma nima'okana i na 'ivaiseni, ma yana nuasako 'aitamogana 'aitamogana i 'isadewadi. Tomogo ma nima'okana i voneni i vo, Nimamu 'u si'otoi.” I si'otoi nika i ve'atumaiotoga. ⁶ ✧ Falisi i 'iseni i souyedi i nagoi i veifufu Kini Elodi yana 'aila'a taiadi bani'odi i na munega Iesu i na 'ivewafai.

'Aila'a lavu lilivaneye.

⁷ Iesu ma yana tovetutuyamavo i nagoi lavuye, siwe 'aila'a bwaikina i yogo'waili, tomotoganidi i maia 'awalawa Galili wata Iudia 'waidiega. ⁸ 'Ifwaidi i maia Ielusalemega, 'awalawa Idumeayega, Ufa Iolidaniega i damana, 'atamana Taia wata Saidoni lilivadiega. Iesu yana folova valana i nogai i maia. ⁹⁻¹⁰ Tomotoga fuedi i 'i'ive'atumaidi faifainanina tovigga i vevetunufelagieni nuanuadi i na 'abitonovi bega i na ve'atumai. 'Aila'a bwaikina bega Iesu

yana tovetutuyamavo i vonedi i vo, Waka 'wa na mieni 'ai'edi i na velubabalekuga bega a na laka a na lau'age.” ¹¹ Wata tomotoganidi yaiaina i agediga Iesu i 'iseni i maia ma yadi ve'ililibu i be'u mataneye i vebwaubwau i vo, 'Omu Yaubada Natuna.” ¹² Siwe Iesu yaiaina i talabodebodedi kebu i na lulu'ivoneyeniga Iesu aitoi.

Iesu yana tovetutuyamavo 12 i venua'ivinedi.

¹³ Tamu tutuya Iesu ma enavo i laka 'oyeye, tomotoganidi Iesu yana nuanua i goledi 'ana to'aivaita, i nagoi 'waineye. ¹⁴⁻¹⁵ ☆Tomotoganidi 'waidiega 'adi 12 Iesu i venua'ivinedi wata i vonedi i vo, 'Omi 'ami 12, a venua'ivinemiga yaku tomata'aulelevo. 'Waikuye 'wa na miamiani, mulieta a na vetunemi 'wa na lau'age tomotoga 'waidie. Wata veimea a na velemini bega 'wa na vona yaiaina tomotoga i agediga i na 'awa'a'idi.”

¹⁶ ☆Tomotoganidi 12 i venua'ivinediga side 'adi wagava.

Saimoni, kumanina Iesu i goleni Fita,

¹⁷ ☆Iemesa ma taina Ioni, Sebedi natunavo. Wata Iesu i goledi Boenati, 'ana saivila Tomuyoana Natunavo.

¹⁸ Anidulu,

Filifi,

Batolomiu,

Madiu,

Tomasi,

Iemesa, Alefasi natuna,

Tadiusa,

Saimoni, toawa'idi'idi kebu nuanuana Loma gabemani i na veveimeyedi,

¹⁹ Iudasa Isakaliota, taunina Iesu 'ana to'etogiluva.

Tomotoga yadi nuanua i vo 'ako, Yaiaina Iesu i agei.”

²⁰ ✧ Iesu ma enavo i viladi i nagoi vanuge, wata 'aila'a bwaikina i maia 'waineye begaidi kebu 'adi fata i na 'ani. ²¹ ✧ Tomotoga 'ifwaidi i vonavona i vo, Iesu i ve'wava'wava,” yana 'aila'avo i nogai i maia i na vagavaia.

²² ✧ Ve'etoboda 'adi tovevo Ielusalemega i maiaga i vona i vo, Seitani,* yaiaina yadi to'edakumeta, Iesu i agei yana toketokena i veleni bega i vonavona yaiaina i 'a'awa'a'idi.”

²³ Bega Iesu i goledi i maia 'waineye i vona-awatabai 'waidie i vo, Yaku folovanina kebu Seitani yana toketokena 'wainega fai Seitani kebu nuanuana enavo i na sogiedi. ²⁴ 'Ai'edi 'eba veimea 'aise'avadi i na 'idia i na vevetalaga bola 'eba veimeanina i na velovi. ²⁵ 'Ai'edi 'atamana 'aise'avadi i na 'idia i na vevetalaga, 'atamananina i na yavulaiwagi. ²⁶ Wata bani'odi 'ai'edi Seitani yana 'eba veimea 'aise'avadi i na 'idia i na vevetalaga i na 'a'avaotoga.” ²⁷ ✧ Wata Iesu i vona-awatabai 'waidie i vo, Kebu tamu aitoi 'ana fata i na luku tamu tomogo toketokena yana vanuge i na vainago, we'e 'ai'edi nuanuana, nagami tomogonina i na yogoni, mulieta i na vainago.

✧ **3:20:** Mak 6:31 ✧ **3:21:** Ion 10:20 ✧ **3:22:** Mad 9:34

* **3:22:** 'Ana mogitana Bielisibabi, Seitani tamu 'ana wagava.

✧ **3:27:** 1 Ion 3:8

28-29 ✧A na vonemi, tomotoga i sakosakonaga wata i vona-awadamana Yaubada 'waineye 'adi fata nuatavuna i na veluagai, we'e egavo i na vona-awadamana 'Anu'anunu 'Atumaina 'waineye, kebu 'ana fata Yaubada i na nuatavunidi, yadi sakona i na 'eno-vagata.”³⁰ Iesu i vonaga fai tomotoga 'ifwaidi i vo, Taunina yaiaina i agei,” we'e mogitana 'Anu'anunu 'Atumaina 'wainega i vona yaiaina i 'awa'a'idi.

Iesu tainavo ma inadi i nagoi Iesu 'waineye.

³¹ ✧Iesu tainavo ma inadi i maia Iesu 'waineye. I tovoi 'atamanega i velutoli Iesu faifaina. ³² 'Aila'a Iesu taiadi i miamianiga i voneni i vo, Taimwavo wata inamu siva'e i lulualemu.” ³³ Iesu i vona i vo, 'Wa da nuani, egavo taikwavoga wata inaku? ³⁴ Tomotoganidi i miafifineniga 'aitamogana 'aitamogana Iesu i 'isedi i vonedi i vo, 'Wa vonaga 'wa vo, Taimwavo wata inamu i lulualemu,” 'wa vona mogitana siwe wata 'omi inakwavo wata taikwavo. ³⁵ ✧Aitoi Yaubada yana nuanua 'ana todumwebika, taunina inaku, novuku, 'alo taiku.”

4

Luyavuyavulagi 'ana vona-awatabai.

¹ Tamu tutuya wata Iesu i vilai i mai Galili i ve lavu lilivaneye. 'Aila'a bwaikina i sififineni faifainanina Iesu i dodoga wakeye i miabui we'e tomotoga matatabudi i tovoi balebaleye 'waidie i lau'age. ²⁻³ Nani fuedi i ve 'waidie vona-awatabaiega. Yana ve 'waineye i vo, A na vonemi.

✧ 3:28-29: Ibu 6:4-6 ✧ 3:31: Mak 6:3 ✧ 3:35: Ion 15:14

Tamu tomogo i nago bakule yana witi waifeidi i na bakulidi, yadi sauluva luyavuyavulagi. ⁴ Yana luyavuyavulagi 'waineye witi 'ifwaidi i ve'anita'idi 'eda balebaleye, manuga i mai i 'anidi. ⁵ 'Ifwaidi i ve'anita'idi bwakebwakeye, inala i kufuadi i tabo-matayo'o fai fwayafwaya kebu badubadunaga. ⁶ 'Aiata-'wane'waneye inala i toke i luyauyauta i 'awagi'adi fai 'walamidi siaidi kebu i da toke i da obuga. ⁷ 'Ifwaidi i ve'anita'idi 'awanavenaveye kebu 'adi 'oiga, tutuyanina i ugawegawedi bega kebu vuagidiga. ⁸ 'Ifwaidi i ve'anita'idi inageye fwayafwaya 'atumaina 'waineye i tabo i vuaga. Witi 'ifwaidi vuagidi 30, 'ifwaidi 60, 'ifwaidi 100. ⁹ 'Akonadi yaku vona 'wa nogai, siwe 'wa na vena'ivinene nika 'wa na 'asetai.”

Vona-awatabai lamuna.

¹⁰ Mulieta Iesu 'aiseneye 'ifwaidi tomotoga toyogo'waila, wata yana tovetutuyamavo 12 i maia 'waineye i voneni i vo, Nuanuama yamu vona-awatabai 'u na kiavemagetadi.

¹¹ ✧ Iesu i vonedi i vo, 'Akonadi Yaubada i tauyemi nani fuedi givagivadi 'wa 'asetadi yana veimea tomotoga 'waideye faifaina. Siwe egavo Yaubada yana veimea i bavuyeni, vona-awatabai 'waidiega Yaubada yana Vona i noganogai.

¹² ✧ Basenadiotoga tobavunidi faifaiddi i kilumi Yaubada yana Buki nageneye i vo,

Tomotoganidi i na 'isa'isa siwe kebu i na 'isa'inanaiga. Wata i na noganogai siwe nuadi kebu i na magetadi.

'Ai'edi mogitana i da 'isa'inanai wata nuadi i da magetadi i da nuaviladi nika Yaubada yadi sakona i da nuatavunidi.”

Vona-awatabai Iesu i kiavemagetai.

¹³ Mulieta Iesu i vonedi i vo, Vona-awatabainina safailina, siwe 'omi kebu 'wa da 'asetaigna, bani'odi 'wa na munega wata 'ifwaidi vona-awatabai 'wa na 'asetadi? ¹⁴ Tomogo tobakula taunina Yaubada yana Vona 'ana toluyavuyavulagi. ¹⁵ Waifei 'ifwaidi i ve'anita'idi 'edeye 'ana nuanua, bani'odi tomotoga Yaubada yana Vona i nogai nika Seitani i yogo-matayo'o Vonanina i elodi. ¹⁶⁻¹⁷ ✧ Waifei i ve'anita'idi bwakebwakeye 'ana nuanua, bani'odi tomotoga ma yadi sosoana Yaubada yana Vona i nogai siwe yadi nuanua 'waidie kebu mogitana i da lukuga. I vetumagana siwe tutuya 'ale'usana. Tutuyanina vita 'alo ve'isakololo i na souyedi Vonanina faifaina i na baila-matayo'oyeni. ¹⁸⁻¹⁹ ✧ Waifei i ve'anita'idi gaweye 'ana nuanua, bani'odi tomotoga Yaubada yana Vona i nogai siwe yadi mia faifaidi i vevenuafouviga, 'ai'aiwabu nuadi i 'ewa'ewadi wata kukua 'adi nuanua 'waidie bwaikina 'wa da vo Yaubada yana Vona i da ugawegaweni kebu i da vuaga. ²⁰ We'e waifei i ve'anita'idi inageye fwayafwaya 'atumaina 'waineye 'ana nuanua, bani'odi tomotoga Yaubada yana Vona i nogai nika taunidi i tauyedi 'waineye mulieta yadi folova Yaubada faifaina bani'odi i vuaga. 'ifwaidi 30, 'ifwaidi 60, wata 'ifwaidi 100.”

✧ **4:16-17:** Kolos 2:7 ✧ **4:18-19:** Mak 10:21-22; 1 Tim 6:9-10

Mageta 'aivoe dibuneye.

²¹ Iesu i velutoliedi i vo, Lovane mageta ta na kabuni, mulieta bani'odi ta na munegi? 'Aivoeyega ta na talafwaseni 'alo talalia 'ayaneye ta na yatoi? Kebu, mageta ta na lutalauleni bega i na magemagetai. ²² Wata de'e bani'odi, ava'ai tomotoga i giveniga Yaubada i na sivemageseni wata ava'ai i nuagiveniga Yaubada i na lu'ivoneyeni. ²³ 'Akonadi yaku vona 'wa nogai, siwe 'wa na venua'ivineni nika 'wa na 'asetai.

²⁴ ✧ Ava'ai 'wa na nogaiga 'wa na venua'ivineni. 'Ai'edi 'wa na 'anivelena-maimaiga siaina, wata 'anivelena-maimaiga siaina 'wa na veluagai. We'e 'ai'edi 'wa na 'anivelena-maimaiga bwaikina, wata 'anivelena-maimaiga bwaikina ma 'ana 'imoso'i 'wa na veluagai. ²⁵ 'Ai'edi aitoi sai'afo ma yana 'aseta Yaubada faifaina, bega 'asetanina i na 'i'isave'aviniga, 'imoso'i Yaubada i na veleni, we'e aitoi kebu tamu yana 'aseta siwe igodi i vo, Yau yaku 'aseta bwaikina," 'asetanina Yaubada i na eloi."

Vona-awatabai waifei yadi tabo faifaidi.

²⁶ Yaubada yana veimea tomotoga 'waidie yana vebwaika faifaina Iesu i vona-awatabai i vo, Yaubada yana veimea bani'odi tamu tomogo waifei i bakulidi. ²⁷ Tofolovanina 'aiaseye i folofolova, lovane i 'eno'eno we'e waifei yadi tabo wata yadi vebwaika kebu i da 'asetadiga. ²⁸ Fwayafwaya taunina 'ani'ani i 'ivetabodi, nagami i tautaula mulieta 'ani'aninidi

✧ 4:24: Luk 6:38

i sousouyedi. 29 ✧Tutuyanina i luludabadaba i 'a'aiala fai tutuya kumaga.”

Iesu i awatalatutula 'ayawana bilana 'wainega.

30 Wata Iesu i vona-awatabai i vo, Bani'odi ta na voneyedi Yaubada yana veimea yana vebwaika faifaina 'alo ava'ai 'wainega ta na awatalatutula? 31-32 Yana vebwaika bani'odi 'ayawana, bilana saiotogina siwe 'ai'edi i na tabo, i na vebwaika welavi bwaikaotogina. Didina bwaikidi bega manuga i na mimaia 'waineye i na veve'i'wa'u i na vevegiuva.”

33-34 ✧Iesu tomotoga i lu'ageyedi vona-awatabai fuedi 'waidiega bega 'adi fata i na 'aseta. Kebu tamu tutuya vona-awatabai i da baileni, siwe yana tovetutuyamavo taiadi 'aisedie naninidi matatabuna i kikiavemagetadi.

Iesu yagina i 'iveniwalovi.

35 Inala 'akonadi i obu, 'aiatanina 'waineye Iesu yana tovetutuyamavo i vonedi i vo, Ta na damana no'o bega lavu vi'ainega.” 36 Iesu 'akonadi i dodoga wakeye, bega yana tovetutuyamavo wata i dodoga taiadi i nagoi 'aila'a i 'iawedi, we'e 'ifwaidi waka taiadi i nagoi. 37 I nunagoi kaukau bwaikina i nunuga wata yagina waka i ludo-dododogi sai'afoga i da veadagi. 38 Iesu i 'unugalo i 'eno'eno waka mulineye. Tovevutuyamavo i luvagoni i vo, Tove 'u tovoi, i na vileda ta na wafa kebu faifaina 'u da nuanua.”

39 I tovoi kaukau i talabodeni i vo, 'U 'ailove,” wata yagina i voneni i vo, 'U niwalova,” nika kaukau i 'awatagoni i niwalova bwaikina.

40 ✧ Iesu yana tovetutuyamavo i vonedi i vo, Awale 'wa kololo? 'Omi bola kebu 'wa da vetumaganeku.” 41 ✧ Tovetutuyamavo 'akonadi kaukau wata yagina yadi 'ailove i 'isedi i kololo bwaikina Iesu yana toketokena faifaina. 'Aise'avadi i veifufu i vo, Ava'ai tomotogaga de'e? Nani matatabuna kaukau wata yagina taiadi bonana i noganogai i vevematayakayaka.”

5

Iesu tomogo yaiaina i ageiga i 'ive'atumaia.

1 Iesu ma enavo i maia lavu vi'ainega me Gelasine yadi 'awalaweye. 2 ✧ Tutuyanina i le'wai wakayega i obuma tamu tomogo yaiaina i ageiga i veluagai taumatayega i mimai. 3-4 Tomogonina yana 'eba mia taumatanidi 'waidie. Tutuya fuedi tomotoga 'agenawata nimana i yogoyogonidi bulava kainumu 'waidiega siwe i dabadabadi, kebu wata aitoi 'ana fata i na vetoketoke bega i na 'ive'avini i na yogoni. 5 'Aiata lovana 'aitamogana 'aitamogana taumaseye wata 'oyeye i vevebwaubwau taunina i nikenikei kileuyega.

6 Tomogonina 'ani'ieyega Iesu i 'isanaweni, i lilide i nago ma yana ve'ililibu i 'odu mataneye. 7-8 ✧ Iesu yaiaina tomogo nageneye i voneni i vo, 'U 'awa'a'imu 'omu yaiaina sakoimu.” Yaiaina i vegole bonana bwaikinega i vo, Iesu, 'omu Yaubada Tabwaotogineye Natuna, ava'ai nuanuamu 'u na 'idewai 'waikuye? Yaubada 'ana wagavayega 'u na vona mogitana kebu 'u na luvematavulogiku.”

✧ 4:40: Mad 14:31 ✧ 4:41: Same 89:9 ✧ 5:2: Mak 1:23

✧ 5:7-8: Mak 1:24

9 Wata Iesu i velutolieni i vo, Aitoi 'amu wagava?" I vo, 'Aku wagava 'Aila'a, fai ma 'aku labilabina fueidi." 10 Wata i toke i vevelu'ui 'waineye i vo, Kebu nuanuama 'u na veugeugema de'e 'awalawanina 'wainega."

11 Fatala bwaikina bawe 'oya lilivaneye i luluaduala. 12 Yaiaina i velu'ui-vaitugana Iesu 'waineye i vo, 'U da vetunema bawenidi 'waidie 'a da agedi." 13 I tauyedi, yaiaina i 'awa'a'idi i nagoi bawe i agedi. Bawenidi fatala 2000 i ve'ililide i obu 'oyeamo, i sou bwagale i ve'alamonumu lavuye.

14 Bawe 'adi to'isave'avinavo i 'iseni i dega i nagoi 'atamane wata bakule i veifufuyeni, bega tomotoga fueidi i nagoi i na 'iseni ava'ai i vonevoneyeni. 15 Tomotoganidi i maia Iesu 'waineye, tomogo basenadi yaiaina fueidi i ageiga siwe 'akonadi i ve'atumai i 'iseni i ve'wesena, 'atumaina i miamia begaidi i kololo. 16 Tomotoganidi matadie tomogo i ve'atumaiga wata bawe yadi monu, faifaidi tomotoga i le'wai 'waidie i veifufu. 17 'Atamananina 'ana tomotoga Iesu i voneni i vo, Nuanuama 'u na tauya yama 'awalawa 'u na 'iaweni."

18 Mulieta Iesu i dododoga tomogonina yaiaina i ageiga i vona i vo, Iesu yau nuanuaku taiadi ta da nago." 19 Siwe Iesu i talabodeni i vo, 'Auvea i 'isanuakalikalieumu i 'ive'atumaimu, bega 'u na nago yamu 'aila'a 'waidie 'u na lu'ivona." 20 Bega tomogo i nago naninidi matatabuna Iesu i 'idewadiga 'waineye i lu'ivona 'awalawa Dekafolisi matatabuna 'waineye. Tomotoga fueidi i nogaiga nuadi i voganidi.

Yailo natuna yana ve'atumai wata vavine tamu Iesu 'ana kaleko i 'abitonovi.

²¹ Iesu ma enavo wata i vila-vaituganidi i damanama de'e bega lavu lilivaneye 'aila'a bwaikina i sififineni. ²²⁻²³ ✧ Me Diu yadi 'eba miava'auta 'ana to'edakumeta tamu, 'ana wagava Yailo Iesu i 'iseni i nago 'waineye ma yana ve'ililibu 'ageneye i be'u i lukakadeni i vo, Natuku vevinena sai'afoga yawaina i na 'a'ava. 'U da mai ta da nago nimamu 'u da yatoi 'waineye bega i da ve'atumai.” ²⁴ Iesu Yailo taiadi i nunago wata 'aila'a bwaikina i vevetunufelagieni nuanuadi Iesu taiadi i na nagoi.

²⁵ 'Aila'anina nagedie tamu vavine, vevine 'adi viga i 'ewadi, malamala 12 nagedie kebu i da 'a'ailove viganina i 'eno'eno. ²⁶ Tutuya fueidi i nunago tokweli fueidi 'waidie igodi i na ve'atumai siwe wata veviga i veveluagai kebu i da veve'atumai i sakotoga, we'e yadi kukua i ve'a'avadi fu'eyega. ²⁷⁻²⁸ ✧ Iesu valana i nogai bega 'aila'a taiadi i nunagoi, yadi nuanua i vo, 'Ai'edi Iesu 'a na 'abitonoviga 'a na ve'atumai siwe wata 'ai'edi 'ako 'ana kaleko'ava 'a na 'abitonovimo 'a 'asetai 'a na ve'atumai.” ²⁹ Tutuyanina i 'abitonovi 'adi viga i 'a'ava i vebaedi 'akonadi i ve'atumai.

³⁰ ✧ Nika Iesu i 'asetai yana toketokena i damana vavine 'waidie bega i sivilai i velutoli i vo, Aitoi 'aku kaleko i 'abitonovi?” ³¹ Yana tovetutuyamavo i vo, Kebu 'u da 'asetai'iga 'aila'a taiadi ta nunagoiga, awale 'u vo, Aitoi i 'abitonoviku?” ³² Siwe Iesu i 'i'isadaba nuanuana i na 'asetai aitoi

✧ **5:22-23:** Mak 7:32; Luk 13:13 ✧ **5:27-28:** Mak 6:56 ✧ **5:30:** Luk 6:19

i 'abitonovi. ³³ Vavine i 'asetai i lulualedi begaidi i kololo, ma yadi tatava wata ma yadi ve'ililibu i be'u Iesu 'ageneye i lu'ivona mogitana taunidi faifaidi. ³⁴ ✧ Iesu i vonedi i vo, Natuku, yami vetumagana 'waikuye i 'ive'atumaimi. Ma yami sosoana 'wa na nago, yami viga i 'a'ava-vagata.”

³⁵ Tutuyanina Iesu vavine 'waidie i vonavona 'ifwaidi tomotoga i le'wai Yailo yana vanugayega i voneni i vo, Natumu 'akonadi yawaina i 'a'ava. Kebu wata Tove 'u na vevekadia.” ³⁶ Iesu i nogaiga Yailo i voneni i vo, Kebu bonadi 'u na nogaiga, wata kebu nuafoumu i na veviga 'u na vetumaganamo bega a na 'ivaisemu.” ³⁷ Fuedi i talabodedi tomotoga 'adi 'aitonu taiadi i nagoi, Fita, Iemesa wata taina Ioni. ³⁸ Tutuyanina i le'wai Yailo yana vanuge, Iesu i 'isedi 'aila'a wata vemogai bwaikina. ³⁹ ✧ Bega i luku vanuga nageneye i velutoliedi i vo, Awale 'aila'a wata 'wa vevemogai? Kwamana kebu i da wafaga, i 'eno'eno.” ⁴⁰ 'Aila'a Iesu i sidibidibieni wata i namageni fai i 'asetai kwamananina mogitana i wafa.

Iesu i vonedi matatabudi i souyedi, mulieta enavonidi, kwamana tamana wata inana taiadi i luku kwamananina yana tutudaba 'waineye. ⁴¹⁻⁴² ✧ Kwamana nimaneye i 'abi i sivetovoia bonanega i voneni i vo, Talaida kumi,” 'ana saivila, Kwamana a vonemu, 'u tovoi,” nika vavine i tovoi i yaba. Vavinenina ne'e'elina 'ana malamala 12. Tomotoga i 'iseni nuadi i voganidi. ⁴³ Iesu i talabodedi i vo, Kebu 'wa na lu'ivonaga siwe 'ani'ani 'wa na veleni i na 'ani.”

✧ **5:34:** Mak 10:52; Luk 7:50; 17:19

✧ **5:39:** Ion 11:11

✧ **5:41-42:** Luk 7:14

6

Me Nasaledi Iesu i baileni.

¹ Iesu Yailo yana 'atamana i 'iaweni yana tovetutuyamavo taiadi i nagoi 'ana tuvadeye. ²⁻³ ✧Bei i miamiani 'Aiata Veawai i veluagai i velamu i ve 'eba miava'auta 'waineye. Tomotoga fueidi yana vona i nogai nuadi i voganidi i vo, Tomogo no'o ta 'asetai taunina kamuda, inana Meli, tainavo Iemesa, Iosese, Iudasa wata Saimoni we'e novunavo taiadi ta miamiani. Siwe yana 'aseta wata yana toketokena ava'aiega i veluagadi bega 'eba nuavogana wata 'eba nua'ewa i 'i'idewadi?" Faifainanina i vedumwe'ai'aieni kebu i da vetumaganeni.

⁴ Begaidi Iesu i vonedi i vo, Yaubada yana tolu'ivona ma 'adi ve'ililibu tomotoga tulidi 'waidie, we'e yana 'atamana tomotogidi wata yana 'aila'a kebu." ⁵⁻⁶ Begaidi Iesu nuana i vogani yana 'atamana tomotogidi kebu i da vetumaganeni. Begaidi kebu 'ana fata 'eba nuavogana wata 'eba nua'ewa i da 'idewadiga siwe 'ifwaidi tomotoga Iesu i 'abitonovidi 'adi viga i 'a'ava i ve'atumai.

Iesu i vetunedi yana tovetutuyamavo.

Iesu i nago i veve 'atamana 'aitamogana 'aitamogana 'waidiamo. ⁷ ✧Yana folova i 'a'ava Iesu i vilai i mai yana tovetutuyamavo i goledi i nagoi 'waineye bega 'adi 'ailuga 'adi 'ailuga i na vetunedi. Wata veimea i veledi bega 'adi fata i na vonamo yaiaina i na 'awa'a'idi.

✧ **6:2-3:** Ion 7:15; Ion 6:42 ✧ **6:7:** Luk 10:1

8-9 Iesu i velu'ase'asedi i vo, Yami wautogana wata 'ami 'ageyafayafa 'wa na 'ewadi we'e kebu wata tamu ava'ai 'wa na 'ewadi. 'Ani'ani kebu, venuana kebu, mani kebu, wata kebu tamu kaleko vunavunagina 'wa na 'ewai. ¹⁰ Tutuyanina 'wa na nagoi tamu 'atamana 'waineye, aitoi i na vonemi 'wa na luku yana vanuge bei 'wa na miamia. 'Atamananina 'waineye 'wa na lalau'age, mulieta yami folova i na 'a'ava vanuganina 'wa na 'iaweni. ¹¹ ✧'Ai'edi ava'ai 'atamanaga 'ana tomotoga i na vedumwe'ubu'ubusemiga, wata yami vona kebu i na nogaiga, 'wa na 'iawedi 'wa na nagoi siwe 'agemiega fwayafwaya 'wa na lubutubutuya yadi 'eba 'isa kebu wata bei 'wa na lalau'age wata bola vematavuloga i na veluagai Yaubada 'wainega.”

¹² Bega tovetutuyamavo i nagoi i lau'age i vo, 'Wa na nuavilami yami sakona 'waidiega.”

¹³ ✧Wata tomotoganidi yaiaina i agediga i 'ive'atumaidi wata toviga fueidi bunamayega i iwagidi 'unu'unudie wata i 'ive'atumaidi.

Kini Elodi Ioni i niki.

¹⁴ ✧Tutuyanina 'waineye 'awalawa Isileli nageneye Loma gabemani yadi to'edakumeta bwaikina 'ana wagava Kini Elodi. Iesu yana folova toketokena valana i nogai fai tomotoga fueidi i veveifufu Iesu faifaina. 'Ifwaidi i vo, No'o Iesu, 'asa'aiana taunina Ioni Tobafitaiso, ma yana toketokena i yawasa-vaitugana i ve-Iesu, begaidi 'eba nuavogana wata 'eba nua'ewa i 'i'idewadi.”

¹⁵ Tomotoga 'ifwaidi i vo, Taunina Ilaitia, Yaubada yana tolu'ivona abamega i mai,” we'e 'ifwaidi i

vo, Taunina tamu Yaubada yana tolu'ivona yana sauluva bani'odi tolu'ivonanidi basenadiotoga.

¹⁶ We'e Kini Elodi Iesu valana i nogai i vo, Mogitana Ioni Tobafitaiso, basenadi 'odona a boboi, wata i yawasa-vaitugana.” ¹⁷⁻¹⁸ Elodi bani'odi i voneyediga fai yana veimea 'wainega Ioninina i yogoni i yatoi vanuga 'eba yogona 'waineye mulieta i luwewafai. We'e Elodi, basenadi taina Filifi tamu vavine i nagidi 'adi wagava Elodiasa mulieta Elodi i luobuyedi. Tutuyanina Ioni Tobafitaiso i nogai i nago Elodi 'waineye i voneni i vo, Awale taimu 'u eloi, yada ve'etoboda 'u geuya.” Begaidi Elodi yana tolugavia i vetunedi Ioni i yogoni i yatoi vanuga 'eba yogona 'waineye. ¹⁹ We'e Elodiasa i nuasako nuanuadi Ioni i da wafa siwe kebu 'adi fataga. ²⁰ Elodi ma yana kololo Ioni i 'ita'ita'ieni fai i 'asetai tomogo 'atumaina Yaubada 'wainega. Nuanuana Ioni yana vona i na noganogai, siwe i venuanaluga fai kebu i da 'asetai, mogitana 'alo i vekali.

²¹ Mulieta Elodiasa tamu 'eda i veluagai bega 'adi fata Ioni i na nikei. Elodi yana tubuga 'ana 'aiata 'waineye sakali bwaikina i 'idewai. Tomotoga bwaikidi i goledi i maia sakalinina 'waineye, 'ifwaidi gabemani, 'ifwaidi tolugavia yadi to'edakumetavo wata 'ifwaidi toveimea 'awalawa Galili 'wainega. ²² Sakalinina 'waineye Elodiasa natudi vevinena i mai i kayama matadie bega Elodi wata 'ana wakawakavo taiadi i 'ivesosoanidi. Elodi vavine 'waineye i vo, 'Ai'edi ava'ai nuanuamu 'u na velu'uieku 'ana fata a na velemu. ²³ A vona'awaufaufa 'ai'edi ava'ai nuanuamu a na velemu, 'ai'edi 'u na vo, Yamu

'eba veimea sai'afo 'u na veleku,” 'aku fata a na velemu.”

²⁴ Bega vavinenina i nago inana 'waidie i velutoli i vo, Ava'ai a na velu'uieni?” Inana i vo, Nuanuama Ioni i na wafa bega 'u na voneni 'unu'ununa i na velemu.” ²⁵ Vavine i vila-matayo'oi Elodi 'waineye i vo, Nuanuaku 'asiauotoga Ioni 'u na nikei 'unu'ununa 'aivoeye 'u na dodogi 'u na veleku 'eba 'isa 'akonadi i wafa.” ²⁶ Vonanina i nogai nuana i vita bwaikina siwe kebu 'ana fata i na bailaga fai i vona'awaufaufa 'ana wakawakavo matadie. ²⁷⁻²⁸ Bega Elodi tamu tolugavia i vetunei i nago vanuga 'eba yogona 'waineye Ioni 'odona i boboi, 'aivoeye i dodogi i mieni vavine i veleni. I 'ewai i nago inana i veledi. ²⁹ Tutuyanina Ioni yana tovetutuyamavo i nogai, i maia tomogona i 'ewai matumatuye i silukuveni.

Iesu 'aila'a bwaikina i ve'anidi.

³⁰ ✧ Tutuyanina tomata'aulele i viladi Iesu 'waineye i lu'ivona yadi ve wata ava'ai i 'idewadiga faifaidi. ³¹ Fai 'aila'a bwaikaotogina i mimia wata i nunagoi, Iesu wata yana tovetutuyamavo kebu tamu 'awasasa 'waidie bega i na veawai wata i na 'ani. Faifainanina Iesu i vo, Ta na nagoi tulideye, tamu 'awasasa kebu tomotoginaga 'waineye, ta na veawai.” ³² Bega tulidie i nagoi wakayega i damana ava'aibe bei kebu tamu aitoi i da miamia 'waineye.

³³ Tomotoga fuedi Iesu ma enavo yadi tauya i 'asetai wata 'akonadi i 'isedi, faifainanina 'agediamo i bala 'atamana 'aitamogana 'aitamogana 'waidiamo nagami i le'wai ava'aibe

bei Iesu i nunagoga 'waineye. ³⁴ ☆ Tutuyanina Iesu ma enavo i duduna 'aila'a bwaikina i 'isedi nuana i vita faifaidi wata i 'isanuakalikaliiedi fai 'wa da vo bani'odi 'aisaya sifi kebu 'adi to'isave'avinaga. Begaidi i velamu nani fueidi faifaidi i ve 'waidie.

³⁵ ☆ 'Akonadi lavilavi sai'afoga i na lovani tovetutuyamavo i maia Iesu i voneni i vo, De'e bei 'ani'ani kebu, wata 'akonadi tutuya i ve'ale'usa.

³⁶ Tomotoga 'u na vetunedi i na nagoi taunidi 'adi'adi i na kimwane 'atamana wata kweda 'waidie.” ³⁷ Iesu i vonedi i vo, 'Omi taunimi 'ai'edi ava'ai 'wa veledi i na 'ani.” Tovetutuyamavo i vo, Vetuma nuanuamu 'a na nago 'ani'ani bwaikao-togina bani'odi 'ana tutula lubulubu 200* 'a na 'ewadi.” ³⁸ Iesu i velutoliedi i vo, 'Aivia 'ani'ani 'waimie. 'Wa nagoi 'wa 'iseni.” 'Akonadi i 'iseni i maia i voneni i vo, 'Ani'ani mwadodoudi 5 wata igana 'ailuga 'a veluagadi.”

³⁹ Mulieta Iesu yana tovetutuyamavo i vonedi i vo, 'Wa na vonedi tomotoga i na veiwakukuna mosomoso 'waidie.” ⁴⁰ I veiwakukuna, kukuna 'ifwaidi bani'odi tomotoga 100, 'ifwaidi bani'odi 50.

⁴¹ Bega Iesu 'ani'ani i 'ewai i 'isalaka abame Yaubada 'waineye i vekaiwa i 'a'avana mwadodoudi i 'ewadi i 'ivividi. Yana tovetutuyamavo i veledi i veuseni tomotoga 'waidie. Wata igana bani'odi. ⁴² Matatabudi i 'ani kamodi i aidi.

⁴³ Tovetutuyamavo tomotoga nikilidi i va'augidi bayawa 12 i veadagidi. ⁴⁴ 'Aila'anidi i 'aniga iaveta tulai'avadi 5000, we'e vevine wata kwakwama kebu i da lu'iawawadiga.

☆ 6:34: Mad 9:36 ☆ 6:35: Mak 8:1-9 * 6:37: Diu yadi mani Denali 200. Denali 'aitamogana, 'aiata 'aitamogana 'ana folova tutulina.

Iesu ufa tabwaneamo i nago.

⁴⁵ Tomotoga i ve'anidi i 'a'avana, Iesu yana tovetutuyamavo i lukakadedi i vo, 'Wa na dodoga wakeye 'wa na kumeta 'wa na nagoi Bedasaida, yau 'aila'a a na vonedi i na nagoi.” ⁴⁶ ✧ Tomotoga i tauya i nunagoi Iesu i laka 'oyeye bei i velu'ui.

⁴⁷ 'Akonadi i laviotogi we'e waka lavu kamwaneye Iesu 'aiseotogina 'avale. ⁴⁸⁻⁵⁰ ✧ Yana tovetutuyamavo i 'isa'anunuyedi ma yadi toke-maiga i voivoi fai kaukau i veveviladi. Sai'afoga tutuya i na fuai nika Iesu i le'wa lilivadiamo i nago ufa tabwaneamo. Tutuyanina Iesu i nunago 'waidie fuedi 'isanaweni ma yadi kololo i 'we'weleni i vo 'ako, Yalua.” Bega Iesu i vonamatayo'oyedi i vo, Kebu 'wa na kolologa, yau taunida.” ⁵¹ I nago i dodoga wakeye yana tovetutuyamavo 'waidie nika kaukau i 'awatagoni. Faifainanina tovetutuyamavo nuadi i voganidi. ⁵² ✧ We'e bagase Iesu 'aila'a bwaikina i ve'anidi yana tovetutuyamavo nuadi kebu i da magetadi yana toketokena faifaina, Iesu i 'iseni ufa tabwaneamo i nunago, nuadi i voganidi, bola kebu i da 'asetaiaga.

Iesu toviga i 'ive'atumaidi Genesaleta 'waineye.

⁵³ I duduna Genesaleta balebaleye bei yadi waka i lomuyeni. ⁵⁴ Tutuyanina wakayega i obuobu tomotoga fuedi Iesu i 'isa'inaanai. ⁵⁵ Tomotoganidi i lilide i nagoi 'awalawanina matatabuna 'waineye yadi toviga i miedi ava'aibe bei Iesu i miamia 'waineye. ⁵⁶ ✧ Iesu i nago

✧ **6:46:** Mak 1:35; Luk 5:16, 6:12 ✧ **6:48-50:** Luk 24:36-37

✧ **6:52:** Mak 8:17 ✧ **6:56:** Mak 5:27-28

'atamana siaidi, bwaikidi, wata kweda 'waidie, tomotoga yadi tovinga i miedi 'atamanafouye i yatodi i velu'ui Iesu 'waineye nuanuadi i na 'abitonovidi we'e 'ai'edi kebu, 'ana kaleko mataifwa'ayana i na 'abitonovi. Matatabudi Iesu i 'abitonovi i ve'atumai.

7

Diu tubudiavo yadi ve.

¹⁻⁴ Diu matatabudi siwe mogitana totafalolo Falisi, ve'etoboda tubudiavo 'waidiega i maiga i veve'ililibuyedi. Nimadi i na lekoa-dewadi bani'odi yadi ve'etoboda mulieta i na 'ani, fai yadi nuanua igodi i vo, Nimada ta na lekoa-dewadi wata ta na tafalolo bega Yaubada i na 'asetada yada nuanua vunavunagidi.” Yadi sauluva 'ai'edi 'eba sivedavedamana 'wainega i na maia, nagami nimadi i na lekoa-dewadi, mulieta i na 'ani. Wata 'ifwaidi ve'etoboda tubudiavo 'waidiega i veve'ililibuyedi, nau, vedi, 'aivoe, wata sita i lelekoa-dewadi.

Tamu 'aiata 'waineye Diu totafalolo Falisi wata 'ifwaidi ve'etoboda 'adi tovevo i maia Ielusale-mega Iesu 'waineye i va'auta. I 'isedi yana tovetutuyamavo i 'ani'animo kebu i da 'ilekoa yadi ve'etoboda bani'odi.

⁵ Begaidi Falisi wata ve'etoboda 'adi tovevo Iesu i velutolieni i vo, Awale yamu tovetutuyamavo yada sauluva tubudavo 'waidiega kebu i da ve'ililibuyedi we'e i 'ani'animo kebu i da 'ilekoa?” ⁶ ✧ Iesu i vonedi i vo, 'Omi tovekali. 'Awami i tatalaboda nani fuedi faifaidi siwe wata 'wa 'i'idewadi. Basenadiotoga Yaubada yana

✧ 7:6: Ais 29:13

tolu'ivona Aisea Yaubada yana Vona 'wainega i vona-vagata faifaimi. I vonaga mogitana i vo,
De'e 'aila'anidi 'awakebuladiega i ve'ililibuyeku,

We'e kebu mogitana i da nuakalikalieku.

⁷ Fai tomotoga yadi nuanua i veve i vo 'ako, Yaubada 'wainega,
Begaidi 'waikuye
i 'o'odu-maimaiga.”

⁸ Wata Iesu i vo, Aisea i kilumi mogitana, Yaubada yana veimea 'wa bailedi we'e tomotoga yadi ve 'wa vevematayakeyakedi.”

⁹ Wata i vonedi i vo, Yaubada yana veimea 'wa baibailedi we'e taunimi yami ve'etoboda 'wa veve'ililibuyedi 'wa nuani 'wa vo 'ako, 'Atumaidi.”

¹⁰ ✧ Basenadiotoga Mosese Yaubada yana veimea i veleda i vo, Tamamiavo wata inamiavo 'wa na ve'ililibuyedi.” Wata i vo, 'Ai'edi aitoi tamana wata inana i na vebonaivoyedi 'alo i na yagayagaidi 'wa na nikei i na wafa.” ¹¹⁻¹² Veimeanidi 'wa geugeudi fai 'wa veve 'wa vo, 'Ai'edi aitoi ma yana mani, siwe kebu nuanuana tamana wata inana i na 'ivaisediga, 'omi 'wa tauyeni bega i na vonedimo i na vo, Mani de'e a da vele mi siwe a na 'aniveleneni Yaubada faifaina,” vonanina 'wa fali'atumaieni. We'e mogitana i lubwaineni tamana wata inana maninina 'wainega i da 'ivaisedi. ¹³ De'e bani'odi Yaubada yana Vona 'wa lulu'avo'avovoi, ma'itufa ve'etoboda tubumiavo 'waidiega 'wa vevematayakeyakedi. Wata nani fuedi bani'odi 'wa 'i'idewadi.”

Naninidi tomotoga i na 'ivesakodi.

¹⁴ Wata Iesu tomotoga i goledi i nagoi 'waineye, i vonedi i vo, 'Wa na nogaya fuemi, nika 'wa na 'asetai. ¹⁵ ✧ Tamu ava'ai i na luku tomotoga nagedie, kebu 'ana fata tomotoganidi i na 'iveyokedi. Siwe mogitana vona 'alo nuanua sakoidi tomotoga 'waidiega i na souyediga, naninidi tomotoga i na 'iveyokedi. [¹⁶ 'Akonadi yaku vona 'wa nogai, siwe 'wa na venua'ivineni nika 'wa na 'asetai.”]

¹⁷ Iesu tomotoga i 'iawedi i nago vanuge, mulieta yana tovetutuyamavo i velutolieni yana ve faifaina. ¹⁸⁻¹⁹ Iesu i vonedi i vo, 'Omi bola kebu ma yami 'asetaga. 'Wa da 'asetai 'ai'edi 'ani'ani ta na 'ania kebu 'ana fata i na 'ivesakoda, fai kebu i na nago yada nuanua 'waidie, kamodeye i na luku bega yogo yana 'edeye i na nago.” Iesu bani'odi i vonaga 'ani'ani matatabuna 'atumaidi ta na 'anidi, kebu tamu sakona 'wainega i na souyeni. ²⁰ Wata i vo, Ava'ai tomotoga nagediega i na souyedi naninidi tomotoga i na 'iveyokedi. ²¹ ✧ Tomotoga nagediega nuanua sakoidi i sousouyedi bega i vevesauluva sakoina bani'odi ve'avula-'avo'avovo, vainago, luvewafa, wata lauobu. ²² Wata 'ifwaidi sauluva sakoidi, bani'odi veumokai, veviga 'ana tolive'eda, vekali, sakona 'ana vebaisa, ve'unumagigi, vebonaivo, taunidi i na awa'ai'aidiga, wata venua'ivina-sako. ²³ Naninidi i souyedi tomotoga nagediega, bega tomotoganidi i 'ivesakodi.”

Vavine yadi vetumagana.

24 'Atamananina 'waineye i veveifufu, Iesu i 'iaweni i nago tamu 'awalawa 'waineye, 'atamana Taia lilivaneye. I le'wa i luku vanuge, kebu nu-anuana tomotoga i na 'asetai yana 'eba mia fai nuanuana i na veawai, siwe kebu 'ana fata i na giva. 25 ✧We'e vavine tamu natudi vevinena ya-iaina sakoina i ageiga, Iesu valana i nogai i mai ma yadi ve'ililibu i be'u 'ageneye. 26 Vavinenidi kebu vavine Isileliga taunidi i tubuga 'atamana Finisia, 'awalawa Silia nageneye, siwe Iesu i velu'uieni nuanaotogidi natudi i na 'ive'atumaia.

27 Iesu vavine i vonedi i vo, Nagami kwakwama a na ve'anidi. Kebu i da lubwaineku kwakwama 'adi'adi a na elodi a na 'anivelenedi 'ou'ou 'waidie.” 28 Vavine i 'asetai Iesu i von-avona nagami i na folova taunina yana 'aila'a Diu 'waidie, faifainanina i voneni i vo, 'Auvea, we'e mogitana. Siwe tutuyanina kwakwama i na 'ani'ani, 'ou'ou siaidi mukumuku i na luluyamuyamu. Faifainanina sai'afo 'u da 'ivaisema.” 29 ✧Iesu i vonedi i vo, Fai yami vona 'ana noga-gaya 'atumaina 'wa na nago, natumi 'akonadi i ve'atumai yaiaina i 'awa'a'ia.” 30 I nago i le'wa yadi vanuge natudi i 'iseni 'ivie i 'eno'eno 'akonadi viga i 'a'ava.

Tomogo tanigana 'uluna wata meana tafilina Iesu i 'ive'atumaia.

31 Iesu i tauya Taia 'wainega i nago 'atamana Saidoni, bega 'awalawa Dekafolisi 'waidiamo i nago i le'wa Lavu Galili. 32 ✧Tomotoga 'ifwaidi

✧ 7:25: Mak 9:17-18 ✧ 7:29: Ion 4:50-51 ✧ 7:32: Mak 5:23

tamu tovinga i mieni Iesu 'waineye i velu'ui nu-anuadi nimana i na yatoi iadi 'waineye bega i na ve'atumai. Toviganina tanigana 'uluna wata meana tafilina. ³³ Iesu tomogo 'aila'a 'waidiega i 'ewai 'aiseneye i naweni nimadidina i 'etouyedi tomogonina tanigana 'waidie wata nimaneye i ki-wala bega tomogo meana i 'abitonovi. ³⁴ Mulieta abame i 'isalaka i veyawaitunatunagi i 'a'avana bonanega i vona i vo, Efada,” 'ana saivila, 'Wa 'ani'inimi.” ³⁵ Yana voneye tomogo tanigana i 'ani'inidi wata meana i tonova nika i welava.

³⁶ Wata i viladi i mai 'aila'a 'waidie Iesu i velu'ase'asedi kebu i na lu'ivona tomogo i 'ive'atumaia faifaina siwe fuedi i lu'ivo'ivona.

³⁷ Egavo i 'iseni nuadi i voganidi bwaikina, i vo, Nani i 'i'idewadiga 'atumai'avadi. 'Eba nuavogana wata 'eba nua'ewa i 'i'idewadi siwe wata tomotoga tanigadi i kia'inidi i nogaya wata meadi i kiavetonovidi i welava.”

8

Iesu tomotoga 4000 i ve'anidi.

¹⁻² Tomogo i 'ive'atumaia i 'a'avana, kebu 'aiata fuediga tamu 'aiata 'waineye, wata 'aila'a bwaikina i va'auta. 'Adi'adi kebu, begaidi Iesu yana tovetutuyamavo i goledi i nagoi 'waineye i vonedi i vo, Tomotoga de'e faifaidi a nuavita fai 'akonadi 'aiata 'aitonu taiadi ta miamiani siwe 'ani'ani kebu tamu faifaidiga bega i na 'ani. ³ 'Ai'edi ma 'adi lase a na vetunedi yadi 'atamane bola 'edeye laseyega i na mwea fai 'ifwaidi 'ani'ieyega i maia.” ⁴ Yana tovetutuyamavo i vo, De'e kebu tomotoginaga, kebu tamu aitoi 'ana fata 'ani'ani i

na veluagai bega 'aila'a de'e ta na ve'anidi.” ⁵ Iesu yana tovetutuyamavo i velutoliedi i vo, 'Aivia 'ani'ani 'waimie?” I vo, 'Ani'ani mwadodoudi 7 'waimeye.”

⁶ 'Aila'a i vonedi fwayefwayeye i vemiamiabui. Mulieta 'ani'aninidi 7 i 'ewadi, i vekaiwa Yaubada 'waineye, i 'a'avana i 'ivividi bega yana tovetutuyamavo i veledi 'aila'a i veutadi. ⁷ Wata 'adi igana siaidi 'ifwaidi faifaidi Iesu i vekaiwa i 'a'avana yana tovetutuyamavo i veledi wata bani'odi tomotoga i veutadi. ⁸ Matatabudi i 'ani, 'adi fata. To'aninidi iaveta tulai'avadi i lu'iawawadi 'adi 'aila'a bani'odi 4000, we'e vevine tulaidi wata yavayavava matatabuna kebu taiadi i da lu'iawawadiga. ⁹ ✧Tovetutuyamavo tomotoga nikilidi i va'augidi, bayawa 7 i veadagidi. Mulieta Iesu tomotoga i vonedi i nagoi yadi vanuge. ¹⁰ We'e Iesu ma yana tovetutuyamavo i dodoga wakeye i nagoi 'awalawa Dalimanuda 'waineye.

Falisi nuanuadi Iesu i na silubuya.

¹¹ ✧Diu totafalolo 'ifwaidi Falisi i maia Iesu 'waineye taiadi i ve'ikwayekwayega. Nuanuadi i na silubuya i vo, Tamu 'eba 'isa toketokena 'u na 'idewai bani'odi Yaubada 'aisena 'ana fata i na 'idewai, bega 'a na 'asetai mogitana taunina i vetunemu.” ¹² Iesu i veyawaitunatunagi i 'a'avana i vo, 'Omi tutuya de'e 'ana tomotoga, awale nu-anuami 'eba nuavogana wata 'eba nua'ewa a na 'idewai? A vona mogitana kebu tamu 'eba 'isa a na vevemi.” ¹³ Bega i 'iawedi i dodoga wakeye yana tovetutuyamavo taiadi i damana lavu vi'ainega.

✧ **8:9:** Mak 6:44 ✧ **8:11:** Mad 12:38; Ion 6:30

Vona-awatabai isita faifaina, naninina beledi i ivebwaiki.

¹⁴ Tovetutuyamavo nuadi i fani kebu tamu 'ani'ani i da 'ewai, beledi 'aitamogana wakeye.

¹⁵ ✧ Iesu vona-awatabaiega i velu'ase'asedi bega tomotoga sakoidi yadi sauluva kebu i na damana 'waidie. I vo, 'Wa na 'isave'avinimi totafalolo Falisi yadi isita wata Kini Elodi yana isita i na nunago i na vedamanimi.” ¹⁶ 'Aise'avadi i veifufu i vo, Isita* beledi 'ana 'eba 'ivebwaika, bani'odi i voneyediga fai 'ida beledi kebu ta da 'ewadiga.”

¹⁷ ✧ Yadi vonanina Iesu 'akonadi i 'asetai faifainanina i vo, Awale 'wa ve'ivonavona 'ani'ani kebu ta da 'ewadiga faifaina? We'e nuami tabodadi. Voke yami nuanua bola kebu i da magetaiga wata kebu 'wa da 'asetai. ¹⁸ Ma matami siwe kebu 'wa da 'iseni wata ma tanigami siwe kebu 'wa da nogai. Yau ma yaku toketokena we'e voke nuami i fani.” ¹⁹ ✧ Tutuyanina 'ani'ani 5 a 'ivividi tomotoga 5000 faifaidi, nikila 'wa va'augidiga 'aivia bayawa 'wa veadagidi?” I vo, 12.” ²⁰ ✧ Wata i vo, 'Ani'ani 7 a 'ivividi tomotoga 4000 faifaidi, 'aivia bayawa 'wa veadagidi nikilayega?” Tovetutuyamavo i vo, 7.” ²¹ Iesu i vo, Voke bola kebu 'wa da 'asetai. We'e 'omi 'wa nuaniga, igodina yau nuafouku i da veveviga fai kebu 'ada'adaga.”

Iesu tomatasako i 'ive'atumaia Bedasaida 'waineye.

✧ **8:15:** Luk 12:1 * **8:16:** Isita falawa matatabuna 'waineye i na susula, bani'odi walabo 'aluna, 'ai'edi i na 'anibiai 'aisayanina matatabuna i na 'ivesakoi. ✧ **8:17:** Mak 6:52 ✧ **8:19:** Mak 6:41-44 ✧ **8:20:** Mak 8:6-9

²² Iesu ma yana tovetutuyamavo i maia Bedasaida 'waineye tomotoga tamu tomatasako i mieni Iesu 'waineye, i velu'ui 'waineye nuanuadi i na 'abitonovi bega i na ve'atumai. ²³ Iesu tomogo nimaneye i 'abi 'atamanayega i naweni tulineye. Mulieta Iesu tomogo matana i kiwalidi i 'a'avana nimana i yatoi tomogoneye i voneni i vo, 'Amu fata ava'ai 'u na 'isedi?" ²⁴ Tomogo 'isanago i vona i vo, 'Aku fata tomotoga a 'ise'isedi, siwe 'adi 'isa 'wa da vo welavi i da yabayaba." ²⁵ Iesu nimana i yato-vaitugani tomogonina mataneye nika matana i ve'atumai i 'isadewa. ²⁶ Iesu i voneni bega i na nago yana vanuge wata i vo, Kebu 'u na lu'ivona 'atamane."

Fita Iesu i 'asetai.

²⁷ Mulieta Iesu ma yana tovetutuyamavo i tauya i nagoi 'awalawa Sisalia Filifai. I nunagoi 'edeye i velutoliedi i vo, 'Wa da nogaiga tomotoga yadi nuanua yau aitoi?" ²⁸ Tovetutuyamavo i vo, Tomotoga 'ifwaidi i vonaga 'omu Ioni Tobafitaiso wafayega i mai, 'ifwaidi i vonaga 'omu Ilaitia abamega i obuma, we'e 'ifwaidi i vonaga 'omu tamu Yaubada yana tolu'ivona i tovoi-vaitugana."

²⁹ ✨Iesu i vonedi i vo, We'e 'omi, 'wa da nuani yau aitoi?" Fita i vo, 'Omu Keliso, Yaubada 'ana Venua'ivina." ³⁰ Bega Iesu yana tovetutuyamavo i vonedi i vo, Kebu tamu aitoi 'waineye 'wa na lu'ivonaga yau Keliso, Yaubada 'ana Venua'ivina."

Iesu yana wafa i veifufuyeni.

³¹ Iesu i veve yana tovetutuyamavo 'waidie i vo, Yau a vetomotogaotoga i lubwaineku veviga

✨ 8:29: Ion 6:69

fuedi a na veluagadi. Me Diu yadi to'edakumetavo 'au'auveadi, tovelomu 'adi to'edakumetavo wata ve'etoboda 'adi tovevo i na vedumwe'ai'aieku mulieta i na veimea a na wafa, 'aiata 'ana vetonu 'waineye wata a na yawasa-vaitugana.” ³² De'e bani'odi Iesu i voneyediga i vonaotoga. Fita Iesu i voneni i vaganago 'aisedie, i toke i tala-bodebodeni i vo, Kebu bani'odi taunimu 'u na faliwafewafemu.” ³³ Iesu i sivilai yana tovetu-tuyamavo i 'isedi bega Fita i talabodeni i vo, 'U vaganago, yamu nuanuananina Seitani yana nuanua. Bani'odi tomia fwayafwaya yadi nuanua, kebu Yaubada 'wainega.”

³⁴ Mulieta Iesu 'aila'a wata yana tovetutuyamavo i goledi i nagoi 'waineye i vonedi i vo, 'Ai'edi aitoi nuanuana mogitana i na mai 'waikuye taiadi 'a na nagoga, nagami taunina yana nuanua i na bailedi. Fai i na vematayakeyakeku veviga bwaikina i na veluagai yau bani'odi a na veluagai. Voke i na wafa faifaiku yau bani'odi a na wafa 'ai lagalagana 'waineye. ³⁵ 'Ai'edi aitoi yana mia 'ana 'atumaina i na ve'o'oleni, kebu nuanuana yawaina i na tauyeni faifaiku, taunina i na wafaotoga. We'e 'ai'edi aitoi yana mia 'ana 'atumaina wata yawaina i na tauyedi faifaiku wata Valaku 'Atumaina faifaina, mia 'atumaina wata miamia-vagaina i na veluagai. ³⁶ 'Ai'edi tamu aitoi fwayafwaya matatabuna 'ana kukua i na 'ewadi mulieta yawaina i na 'a'ava, ava'ai 'ana 'atumaina? ³⁷ Kebu 'ana fata tamu nani 'wainega yawaina i na kimwanei. ³⁸ 'Asiau tomotoganidi yadi sauluva sakoidi, wata Yaubada i vedumwe'ai'aieni.

We'e 'ai'edi aitoi yau faifaiku wata Valaku 'ana lu'ivona faifaina i na bunumayaga, yau a vetomotogaotoga bola a na vila-vaitugana, wata a na bunumayageni. Yaku vila-vaitugana 'waineye, anelose magemagetadi taiadi 'a na maia, Tamaku yana mageta mataududulina nageneye.

9

¹ Wata Iesu i vo, A vona mogitana 'waimie, 'ifwaimi bola ma yawaimi 'wa na miamia nagami Yaubada yana veimea toketokena tomotoga 'waidie 'wa na 'iseni mulieta 'wa na wafa.”

Iesu i vemaigisivilavila.

² ✧Aiata 6 i 'a'ava mulieta Iesu i vonedi Fita, Iemesa, wata Ioni i 'edakumesedi, 'aise'avadi i laka 'oya bwaikineye. I miamiani nika tovetutuyamavo matadie Iesu 'ana 'isa i vetuli.

³ 'Ana kaleko 'adi lau'avu mataududulina, kebu tamu aitoi fwayefwayeye 'ana fata bani'odi i na 'ilekoediga. ⁴ I 'ise'iseni nika tomotoga 'adi 'ailuga i souyedi Iesu taiadi i veveifufu. Tomotoganidi abamega i obuma, Mosese wata Ilaitia, taunidi basenadiotoga Yaubada yana tolu'ivonavo.

⁵ Nika Fita i vona-matayo'o Iesu 'waineye i vo, Tove, 'ima taiadi ta maia i lubwaineni. Lau'weta 'aitonu 'a na 'idewadi, tamu 'omu faifaimu, tamu Ilaitia faifaina wata tamu Mosese faifaina.” ⁶ Fita kebu 'ana fata ava'ai i na voneyeni fai ma enavo i kololo bwaikina. ⁷ ✧Waowa i mai i tavunidi bona i souyeni waowayega i vona i vo, De'e Natuku nuafouku, ava'ai i na voneyeniga, bonana

'wa na nogai.” ⁸ I vona'a'ava nika tovetutuyamavo i 'isadaba kebu tamu aitoi i da 'iseni, Iesu 'aise'avana.

⁹ 'Oyayega i obuobuma i velu'ase'asedi i vo, Ava'ai 'wa 'isediga, kebu tamu aitoi 'wa na voneniga, nagami yau a vetomotogaotoga wafayega a na yawasa-vaitugana, mulieta 'wa na lu'ivona.” ¹⁰ I talabodedi, kebu i da lu'ivona, siwe 'aise'avadi i veifufu i vo, Yawasa-vaitugana wafayega ava'ai?”

¹¹ Mulieta yana tovetutuyamavo i velutolieni i vo, Awale ve'etoboda 'adi tovevo i vonaga i vo, Ilaitia nagami Yaubada 'wainega i na mai, mulieta Yaubada 'ana Venua'ivina i na souyeni?” ¹² ✧ Iesu yadi vona i tutuli i vo, Ilaitia mogitana nagami i na mai Yaubada 'wainega, nani matatabuna i na 'ivenonogidi, we'e 'wa nuanuani Yaubada yana tolu'ivona basenadiotoga i kilumi yau a vetomotogaotoga faifaiku? I kilumi veviga bwaikina a na veluagai wata tomotoga i na vedumwe'ai'aieku.

¹³ Siwe a na vonemi, Ilaitia tutulina* 'akonadi i mai siwe tomotoga kebu i da 'isa'inanaiga, begaidi vitanidi nuanuadi i na veleniga mogitana i veleni, bani'odi basenadiotoga Yaubada yana tolu'ivona i kilumi.”

Iesu kwamana i 'ive'atumaia.

¹⁴ Tutuyanina Iesu ma enavo i viladi 'oyayega 'ifwaidi tovetutuyamavo i 'isedi i veve'ikwayekwayega ve'etoboda 'adi tovevo taiadi, we'e 'aila'a bwaikina i toviffinedi.

¹⁵ 'Aila'anidi Iesu i 'iseni nuadi i voganidi

✧ **9:12:** Mal 4:5; Ais 53:3 * **9:13:** Ilaitia tutulina siwe 'asa'aiana Ioni Tobafitaiso.

bega i lilide i nagoi nuanuadi taiadi i na veluaga. ¹⁶ Iesu i velutoliedi i vo, Ava'ai faifaina 'wa veve'ikwayekwayega?" ¹⁷ Tamu tomogo 'aila'a nagediega i vo, Tove, natuku a mieni fai yaiaina i agei kebu 'ana fata i na welava. ¹⁸ Tutuyanina yaiaina i vevekadia i tawetaweni i obuobu tanotanoge, 'awanega buobuo, nigona i lovelovenedi wata tomogona i tototola. Yamu tovetutuyamavo a vonedi a vo, 'Wa da 'ive'atumaia," siwe kebu 'adi fataga."

¹⁹ Iesu tomotoga i vonedi i vo, Awale 'omi tomotoganimi Yaubada yana toketokena kebu 'wa da vetumaganeniga? Tutuya manamanawena taiadi ta miamia wata a totokemaigeku bwaikina siwe kebu 'wa da vetumaganeku mogitana. Kwamananina 'wa mieni ta na 'iseni." ²⁰ Kwamana Iesu 'waineye i mieni, siwe tutuyanina yaiaina Iesu i 'iseni kwamana i vekadia i be'u i lui'oi'o'o 'awana buobuo i tubodai. ²¹ Bega Iesu kwamana tamana i velutolieni i vo, Ava'ai tutuyaga de'e i souyeni 'waineye?" Tamana i vo, Basenadi siaineye. ²² Yaiaina tutuya fuedi i vevekadia i be'ube'u 'ai-'ala'alase wata ufeye, igodi nuanuana kwamana i na 'ivewafai. 'Ai'edi 'amu fata 'u da 'isanuakalikalie ma bega 'u da 'ivaisema." ²³ ✧ Iesu i vo, Awale 'u vo, 'Ai'edi 'amu fata?" We'e egavo Yaubada i na vetumaganeni nani matatabuna safailidi 'waidie. ²⁴ ✧ Kwamana tamana i vo, Yau wata ma yaku vetumagana, siwe nuanuaku 'u na 'imoso'i." ²⁵ Iesu i 'isedi tomotoga fuedi i lilide i mimaia, yaiaina sakoina i ta'ali i vo, 'Omu kwamana 'awana 'u 'ibodai wata tanigana 'u 'ive'uluya a

na vonemu. 'U 'awa'a'imu kebu wata 'u na agevaitugani.”²⁶ Yaiaina i vebwaubwau wata kwamana i vekadia i tufa'o'oga nika i 'awa'a'ia. Kwamananina 'ana 'isa 'wa da vo i da wafa, fuedi i vo, Yawaina i 'a'ava.”²⁷ Siwe Iesu kwamana nimaneye i 'abi i sivetovoia nika i tovoi.

²⁸ Mulieta i nagoi vanuge, 'aisedie yana tovetutuyamavo i velutolieni i vo, Awale 'ima 'a vona yaiaina kebu i da 'awa'a'iaga?”²⁹ Iesu i vo, Nagami Yaubada 'waineye 'wa na velu'ui mulieta 'wa na vona 'ana fata yaiaina de'e bani'odi i na 'awa'a'ia, kebu tamu wata ava'ai 'wainega.

Iesu i veifufu-vaitugana yana wafa faifaina.

³⁰⁻³¹ ✧ Kwamana bei i 'ive'atumaiaga 'atamananina i 'iaweni i nagoi 'awalawa Galili 'waineamo. Iesu yana nago kebu nuanuana tamu aitoi i na 'asetai, fai i veve yana tovetutuyamavo 'waidie. I vonedi i vo, Yau a vetomotogaotoga tamu tomogo i na 'etogiluveku, bega mali tomotoga i na luvewafaku, mulieta 'aiata 'ana vetonu 'waineye a na yawasa-vaitugana.”

³² ✧ Vonanina Iesu i voneyeniga enavo kebu i da 'asetai, siwe i kololo kebu nuanuadi i na velutolieni.

Aitoi bwaikaotogina?

³³ Tutuyanina Iesu ma yana tovetutuyamavo i maia Kafaneomi, vanuge i luku i vonedi i vo, 'Edeye ava'ai faifaina 'wa ve'ikwayekwayega?”

³⁴ Siwe kebu nuanuadi i na lu'ivona fai i bunumayaga, we'e yadi ve'ikwayekwayeganina i vo, 'Waidega aitoi bwaikaotogina?”

35 ✨ Iesu i miabui mulieta yana tovetutuyamavo i goledi i nagoi 'waineye i vonedi i vo, 'Ai'edi aitoi nuanuana i na vebwaika, nagami i na vekwamana bega tomotoga i na folovedi.” 36-37 ✨ Mulieta Iesu tamu kwamana i mieni 'waidie i olia bega i vonedi i vo, 'Ai'edi aitoi ma yana nuakalikali tamu kwamana de'e bani'odi i na 'ivaiseni faifaiku siwe 'asa'aiana yau i 'ivaiseku. Wata 'ai'edi aitoi ma yana nuakalikali i na 'ivaiseku, siwe 'asa'aiana Yaubada taunina 'aku tovetune i 'ivaiseni.

Tamu tomogo i vona yaiaina i 'awa'a'ia.

38 ✨ Ioni Iesu i voneni i vo, Tove, 'a 'iseni tamu tomogo 'amu wagavayega i vonavona yaiaina i 'a'awa'a'idi, 'a talabodeni fai taunina kebu 'ada 'aila'a.” 39 Iesu i vo, Kebu 'wa na talabodeniga, aitoi 'aku wagavayega 'eba nuavogana wata 'eba nua'ewa i na 'i'idewadiga mulieta kebu i na awavesakoyeku. 40 ✨ 'Ai'edi aitoi kebu i na vedumwe'ai'aiedaga, ma fueda ta folofolova. 41 'Ai'edi aitoi 'aku wagavayega ufa i na velemini 'wa na yemu fai 'omi yau Keliso yana tomotoga, a vona mogitana yana 'aivaitanina 'ana tutula bola i na veluagai Yaubada 'wainega.”

Vetalaimimila 'wainega sakona i na souyeni.

42 Wata Iesu i vonedi i vo, 'Ai'edi aitoi i na vetumaganeku de'e kwamana bani'odi siwe tamu tomogo i na vetalaimimili i na sakonaga, bola tomogonina veviga bwaikaotogina i na veluagai Yaubada 'wainega. Siwe nagami tomogonina kebu i da vetalaimimilaga, bei tomotoga 'ifwaidi

✨ 9:35: Mak 10:43-44; Luk 22:24 ✨ 9:36-37: Ion 13:20 ✨ 9:38: Mad 10:33; Num 11:27-29 ✨ 9:40: Luk 11:23

kileu vitana i da yogona-matayo'oi 'odoneye i da taweni malaveseye, veviga siaina i da veluagai. I da wafa-matayo'oga i lubwaineni nika kebu i da vetalaimimilaga wata kebu veviga bwaikao-togina i da veluagai Yaubada 'wainega. ⁴³ 'Ai'edi nimamu tamu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta nima'ea'eamu 'u na luku Yaubada 'waineye 'u na mia-vagata. We'e 'ai'edi kebu 'u na boboiga, nimamu 'ailugana 'waidiega 'u na sakosakona, mulieta 'u na wafa 'u na luku 'ai-'ala'alase kebu yana 'weuga 'waineye. ⁴⁴ Bei mwatamwata to-mogomu i na 'e'etokudai, we'e 'ai-'ala'alatanina kebu i na 'weuga. ⁴⁵ 'Ai'edi 'agemu tamu sai'afoga i da kiavebe'umu 'u da sakona, 'u boboi 'u taweni. 'U na boboiga veviga sai'afo nika kebu 'u na sakonaga, mulieta 'age'ea'eamu 'u na luku Yaubada 'waineye 'u na mia-vagata. We'e 'ai'edi kebu 'u na boboiga, 'agemu 'ailugana 'waidiega 'u na sakosakona, mulieta 'u na wafa i na tawemu 'u na obu 'ai-'ala'alase. ⁴⁶ Bei mwatamwata to-mogomu i na 'e'etokudai, we'e 'ai-'ala'alatanina kebu i na 'weuga. ⁴⁷ 'Ai'edi matamu vi'aina sai'afoga i da kiavebe'umu 'u da sakona, 'u kiamwanuya 'u taweni. 'U na kiamwanuyaga veviga sai'afo, nika kebu 'u na sakonaga, mulieta 'amu fata 'aitamoganega 'u na luku Yaubada yana 'Eba Veimea nageneye. We'e 'ai'edi kebu 'u na kiamwanuyaga, matamu 'ailugana 'waidiega 'u na sakosakonaga mulieta 'u na wafa i na tawemu 'u na obu 'ai-'ala'alase. ⁴⁸ Bei mwatamwata to-mogomu i na 'e'etokudai, we'e 'ai-'ala'alatanina

kebu i na 'weuga.

⁴⁹ Wata Iesu i vona-awatabaiedi i vo, Yaubada tomotoga matatabumi i na silubumi 'ai-'ala'alainega bega 'wa na vetoketoke bani'odi eyaga 'ani'ani i 'ive'iwani. ⁵⁰ ✧Eyaga nani 'atumaina, siwe 'ai'edi i na ve'ulaufa kebu 'ana fata i na vegola-vaitugana. 'Ani'ani ta na vetagovi eyaga taiadi i na 'ive'iwani. Wata 'omi bani'odi, yami sauluva 'waidiega tosakona 'wa na 'ive'atumaidi wata ma fuemie 'wa na veiana.”

10

Iesu i ve sa'ila faifaina.

¹ 'Atamana Kafaneomiega Iesu ma enavo i tovoi i nagoi 'awalawa Iudia 'waineye i damana Iol-idani no'o bega. Wata 'aila'a bei i maia Iesu 'waineye i ve 'waidie, bani'odi tutuya fuedi i veve.

² Diu totafalolo Falisi 'ifwaidi nuanuadi tomotoga i na nuasako Iesu 'waineye bega i maia 'aila'a matadie i velutolieni i vo, Tomogo i lubwaineni yana vavine i na vesa'ilidi 'alo kebu?” ³ Iesu yadi velutoli i tutuli i vo, Basenadiotoga Mosese bani'odi i voneyedi bega vonanina i kilumi sa'ila faifaina?” ⁴ ✧Falisi i vo, Mosese i tauyeda tamu lubulubu 'waineye sa'ila vonana ta na kilumi vavine ta na veledi ta na vo, 'Omi 'akonadi 'wa 'a'ava 'waikuyega.” ⁵ Iesu i vonedi i vo, Mosese bani'odi i kilumiga fai sauluva 'atumaina 'wa baila.

⁶ ✧We'e tutuya 'eba velamu 'waineye Yaubada tomotoga i 'idewadi,

✧ **9:50:** Luk 14:34; Kolos 4:6; 1 Tes 5:13 ✧ **10:4:** VeL 24:1

✧ **10:6:** Nag 1:27

Iavetana wata vevinena.

7-8 ✧Faifainanina 'ai'edi tomogo i na nagiga, 'akonadi i 'awa'idia tamana wata inana 'waidiega, yana vavine taiadi i luvetubama.

'Adi 'ailuga siwe 'wa da vo tomotoga 'aitamogana.”

Kebu 'ana fata ta na vo, 'Adi 'ailuga,” fai taiadi i luvetubamaga ta na vo, 'Aitamogana.” 9 Bega Yaubada 'akonadi i luvetubamidiga, kebu 'ana fata mali tomotoga 'alo taunidi i na vemia'idiedi.”

10 Mulieta Iesu ma yana tovetutuyamavo i nagoi vanuge i velutolieni sa'ila faifaina.

11 ✧Iesu i vonedi i vo, Tomogo yana vavine i na vesa'ilidi wata mali vavine i na nagidi, 'akonadi i sakona Yaubada mataneye, wata vavinenidi bunumayaga bwaikina i 'ewai. 12 We'e 'ai'edi vavine yadi lamoga i na sa'ileni, tamu tomogo i na nagia i sakona Yaubada mataneye.”

Iesu nuanuana yavayavava.

13-14 ✧Tomotoga 'ifwaidi yavayavava i mimaiedi bega Iesu i na 'abitonovidi i na vona-nuakalikaliEDI, siwe tovetutuyamavo i talabodebodedi. Iesu i 'isedi i nuasako, bega i vonedi i vo, Kwakwama 'wa bailedi i na maia 'waikuye, fai egavo taunidi tonuaobu yavayavava de'e bani'odi 'adi fata taunidi i na tauyedi bega Yaubada i na veveimeyedi.” 15 A vona mogitana 'waimie, aitoi Yaubada i na vetumaganeni bani'odi de'e yavayavavanidi i vetumaganeku, Yaubada i na veimeyeni yana 'Aila'a nageneye,

✧ **10:7-8:** Nag 2:22-24; Efe 5:31 ✧ **10:11:** 1 Kol 7:10-11

✧ **10:13-14:** Mad 18:2-3

we'e 'ai'edi kebu, kebu 'adi fata i na luku.” ¹⁶ Bega kwakwama i olidi nimana i yatoi 'aitamogana 'aitamogana 'waidie i vona-nuakalikaliedi.

Tomogo 'ai'aiwabuna.

¹⁷ Iesu vanuga i 'iaweni i nunago 'edeye tamu tomogo i mai ma yana ve'ililibu 'agena i vetufano'uyedi mataneyeye i velutolieni i vo, Tove 'atumaimu, nuanuaku a na 'asetai ava'ai a na 'idewai bega mia 'atumaina wata miamia-vagaina a na veluagai? ¹⁸ Iesu i vo, Awale 'u awave'atumaieku? Kebu tamu aitoi 'atumainaga, Yaubada 'aiseotogina 'atumaina. ¹⁹ ☆Ve'etoboda 'akonadi 'u 'asetadi basenadi Yaubada Mosese i veleni faifaida, kebu 'u na luvewafaga, kebu mali tomogo yana vavine 'u na luobuyedi, kebu 'u na vainagoga, kebu 'u na vekali tamu tomogo yana sauluva faifaina, kebu 'u na 'ewa-maimaiga, tamamu wata inamu 'u na ve'ililibuyedi.”

²⁰ Tomogo i vo, Tove basenadi siaikuyega ve'etobodanidi a ve'ililibuyedi.” ²¹ ☆Iesu tomogo i 'iseni i nuakalikalieni i voneni i vo, 'Waimuye nani 'aitamogana kebu 'u da 'idewaiga. 'U na nago yamu kukua wata nani matatabuna 'waimuye 'u na vekimwaneyedi, tutulidi 'u na 'ewadi bega egavo i vewekowekomaga 'u na 'ivaisedi nika 'akonadi 'u ve'ai'aiwabu abame. 'U na 'anivelenedi i na 'a'avana, mulieta 'u na mai 'u na vetutuyameku.” ²² Tomogo i nogai i luvulewa ma yana nuavita i vilai i nago, fai yana 'ai'aiwabu fuedi, nuana i loloi kebu nuanuana i na 'anivelenedi.

☆ **10:19:** Sou 20:12-17 ☆ **10:21:** Mak 8:34; Mak 4:18-19

²³ Iesu i sivilai yana tovetutuyamavo i vonedi i vo, To'ai'aiwabu yadi luku vitana Yaubada yana 'Aila'a 'waineye.” ²⁴ Iesu yana tovetutuyamavo nuadi i voganidi yana vona faifaide, wata i vona-vaitugana 'waidie i vo, Ekwavo a na vonemi, taunidi i ve'ai'aiwabu yadi luku Yaubada yana 'Eba Veimea 'waineye vitaotogina. ²⁵ Bawe yana luku aima mataneamo vitana, we'e tomotoga 'ai'aiwabudi yadi luku abame vitaotogina.”

²⁶ Tovetutuyamavo i venuavogana bwaikina bega 'aise'avadi i vona i vo, Vetuma aitoi 'ana fata Yaubada i na 'ita'ita'ieni bega mia 'atumaina wata miamia-vagaina i na veluagai?” ²⁷ ✧Iesu i 'isanago 'waidie i vonedi i vo, Tomotoga tauni'avadi kebu 'adi fata. Yaubada 'aisena 'ana fata i na 'ivaisedi. Wata nani matatabuna Yaubada 'ana fata.”

²⁸ ✧Fita Iesu i voneni i vo, Maide, 'ima nani matatabuna 'a bailedi 'a maia 'waimuye 'a vevetutuyamemu.” ²⁹ Iesu i vo, A vona mogitana 'waimie, egavo yadi vanuga i 'iawedi faifaiku wata Valaku 'ana lu'ivona faifaina, wata tamadiavo, inadiavo, ediavo, novudiavo, natudiavo wata yadi tanoga i 'iawedi faifaiku, 'awaie naninidi 'adi tutula bwaikaotogina Yaubada i na veledi. ³⁰ Tutuya de'e 'waineye wata tutuya mulina 'waineye naninidi 'adi tutula bwaikaotogina i na veluagadi ma 'adi 'imoso'i, bani'odi 100 nani 'aitamogana i baileniga faifaina. Side bani'odi, i na veluagadiga, vanuga fuedi, inadiavo fuedi, enavo fuedi, novunavo, natunavo wata tanoga fuedi. Siwe wata fai i vevetutuyameku veviga bwaikina i na veluagai

✧ 10:27: Luk 1:37 ✧ 10:28: Mak 1:16-20; Luk 5:28

'aku tovedumwe'ai'ai 'waidiega, we'e tutuya mulina 'waineye mia 'atumaina wata miamia-vagaina i na veluagai. ³¹ We'e tomotoga fue di 'asiau i kumetaga, 'awaie i na vemuli, we'e egavo 'asiau i vemuliga, ma'itufa i na kumeta.”

Iesu yana vona 'ana vetonu yana wafa faifaina.

³² ✨I tauya i nunagoi Ielusalema Iesu i 'edakumeta 'aisena, yana tovetutuyamavo mulineye i maia nuadi i voganidi, we'e egavo 'ana toyogo'waila i kololo fai i nuani nani sakoina i na souyeni. Iesu yana tovetutuyamavo i vonedi i nagoi tulidie i kiavemageta ava'ai i na souyedi 'waineye Ielusalema nageneye faifaina. ³³ I vonedi i vo, Ta na lakaga Ielusalema yau a vetomotogaotoga 'aku gaviavo i na 'etogiluveku tovelomu yadi to'edakumetavo wata ve'etoboda 'adi tovevo 'waidie. Mulieta wafa faifaina i na veimeyeku i na 'a'avana i na 'aniveleneku tomotoga taunidi kebu Diu 'waidie. ³⁴ I na sidibidibieku i na kiwaliku wata i na toke i na fitaliku, mulieta i na luvewafaku. 'Aiata 'ana vetonu 'waineye wata a na yawasa-vaitugana.”

Iemesa wata Ioni yadi velu'ui.

³⁵ Iemesa wata Ioni, Sebedi natunavo, i maia Iesu 'waineye i voneni i vo, Tove, nuanuama tamu nani 'u na 'idewai faifaima.” ³⁶ Iesu i vo, Ava'ai naniga a na 'idewai faifaimi?” ³⁷ Iemesa wata Ioni i vo, Nuanuama bola yamu veimea toketokena i na souyeniga, 'u na silakaima bega 'a na miabui lilivamuye, tamu 'amu 'atagiega, tamu 'amu wamayega.” ³⁸ ✨Iesu i vona-awatabai

'waidie bola yana veviga wata yana wafa faifaidi i vo, 'Omi kebu 'wa da venua'ivinaga 'wa vevelu'ui 'waikuye. Sai'afoga veviga 'ana vedi a na yemuyeni, we'e 'omi 'ami fata vedinina 'wa na yemuyeni? I na bafitaisoku vevigayega, 'ami fata 'omi wata bani'odi?" ³⁹⁻⁴⁰ ✧ Iemesa ma taina i vo, 'Ama fata." Iesu i vonedi i vo, Mogitana 'aku vediega 'wa na yemu wata 'wa na bafitaiso vevigayega yau bani'odi, siwe miabui 'aku 'atagiega wata 'aku wamayega kebu a na 'anivelenediga fai yau kebu yaku 'eba veimea. 'Eba miabuinidi Yaubada i 'idewadi taunidi i venua'ivinediga faifaidi."

⁴¹ Ediavo 10 'adi 'ailuga yadi vona i nogai, faifainanina i kamogala 'waidie. ⁴² Begaidi Iesu matatabudi i va'augidi i vonedi i vo, 'Akonadi 'wa 'asetai toveimea bwaikaotogidi wata to'edakumetavo yadi veimea toketokedi 'waidiega tomotoga i veveimeyedi. ⁴³ ✧ We'e 'omi kebu bani'odi 'wa na munega. 'Ai'edi aitoi nuanuana i na vetomogo-bwaika, nagami i na vetofolova enavo 'waidie bani'odi tamu kwamana. ⁴⁴ We'e 'ai'edi aitoi nuanuana i na veto'edakumeta 'waimie nagami i na vetofolova-maimaiga matatabumi 'waimie. ⁴⁵ ✧ Yau a vetomotogaotoga 'wa na vetutuyameku. Yau a maiga, kebu a da vo, Tomotoga 'wa na foloveku," we'e mogitana a maiga a na vetofolova tomotoga faifaimi, wata yawaiku a na tauyeni tomotoga fuemi a na tuveobumi sakona 'waidiega."

Iesu tomatasako i 'ive'atumaia.

⁴⁶ Iesu ma enavo i maia Ieliko, mulieta i tau-tauya tovetutuyamavo wata 'aila'a bwaikina taiadi. Timio natuna, 'ana wagava Batimio i miamiana 'edeeye, taunina tomatasako kebu 'ana fata i na folova, i vevelu'ui mani. ⁴⁷ ✧I nogai Iesu tomogo Nasaledi valana i vegolegole i vo, Iesu 'omu Kini Devida tubuna, 'u da 'isanuakalikalieku.” ⁴⁸ Tomotoga fueidi i talaboda i vo, 'U ve'wada.” Nika i toke i vegolegole i vo, 'Omu Kini Devida tubuna, 'u da 'isanuakalikalieku.” ⁴⁹ Iesu i tovoi i vona i vo, 'Wa goleni i na mai.” Tomatasako i goleni i vo, 'U sosoana, 'u tovoi 'u nago i golegolemu.” ⁵⁰ Yana velu'uva i taweni, i tovoimatayo'o i nago Iesu 'waineye. ⁵¹ Iesu i velutolieni i vo, Ava'ai nuanuamu a na 'idewai faifaimu?” Tomatasako i vo, Tove, nuanuaku a da 'isala.” ⁵² ✧Iesu tomatasako i voneni i vo, 'Asa'aiana, fai 'u vetumaganeku 'akonadi 'u ve'atumai, 'u na nago.” I vona'a'ava nika matana i ve'atumai, i 'isadewa, Iesu taiadi i nago.

11

Iesu i luku Ielusalema.

¹ 'Akonadi sai'afo Ielusalema lilivaneye i le'wai 'atamana 'ailuga 'waidie Bedifegi wata Bedani. Bei 'Oya Olive 'waineye, Iesu tovetutuyamavo 'adi 'ailuga i vonedi bega i na kumeta. ² Wata i vonedi i vo, 'Atamana debanagomiega 'waineye 'wa na nagoi. Tutuyanina 'wa na le'wai 'wa na 'iseni 'aisaya doniki natudi i luifweni i tovoitovoi tamu vanuga 'waineye, kebu aitoi kwavuneye i da lakaga. 'Wa na yavuya 'wa na mieni 'waikuye.

✧ 10:47: Mad 9:27 ✧ 10:52: Mak 5:34

³ 'Ai'edi tamu aitoi i na vo, Awale 'wa 'ewa'ewai?" 'wa na vo, 'Auvea nuanuana, bola wata i na vevila-matayo'oi."

⁴⁻⁵ Tovetutuyamavo 'adi 'ailuga i nagoi doniki i veluagai vanuga 'awana lilivaneye bei basenadi i luifweni. Tutuyanina i yavuyavuya, 'ifwaidi tomotoga i tofotovoiga i vo, Awale 'wa yavuyavuya?" ⁶ Tovetutuyamavo i vona bani'odi Iesu i vonedi bega doniki i tauyeni. ⁷ Doniki natudi i mieni Iesu 'waineye, 'adi talauma kwavuneye i yatodi Iesu 'ana 'ivi bei i miabui. ⁸ Tomotoga fuedi ma yadi ve'ililibu yana 'eda i 'ivivigavuya 'adi kalekoyega, we'e 'ifwaidi welavi matoutoudi i kinidabadi i ta'ulidi 'edeye. ⁹ ✧ Bega fuedi bonadi bwaikinega i vegolegole tokumeta wata tovemuli i vo,

Kaiwa, kaiwa,*

'Auvea 'ana wagavayega i mimai,

Wata ma yana nuakalikali i na vevesauluva 'atumaina 'waineye.

¹⁰ I na veveimeyeda tubuda Kini Devida yana veimea bani'odi,

Yaubada i na vevesauluva 'atumaina yana 'Eba Veimeanina 'waineye.

Bega Yaubada tabwaotogineye ta na subisubiai."

¹¹ Iesu i nago Ielusalema i luku vanuga 'eba velu'ui nageneye i vai'ala siwe 'akonadi tutuya i ve'ale'usa fai i lavia bega i souyeni ma yana tovetutuyamavo i maia Bedani, kebu 'ani'ie Ielusalema 'wainega.

✧ **11:9:** Same 118:25-26

* **11:9:** 'Ana mogitana Osana me Diu bonadiega.

Iesu yana voneye 'ala'ai i bwavu-matayo'o.

¹² I 'atai Bedaniega i viladi i mimai Iesu i lase.
¹³ 'Ani'ieyega i 'isanago 'ala'ai i 'iseni bega i nago lilivaneye nuanuana i na 'iseni ma vuagina 'alo kebu. Siwe tutuyanina i mai lilivaneye i 'iseni luku'avana fai kebu mogitana 'ala'ai 'ana tutuya.
¹⁴ ✧Iesu 'ala'ai 'waineye i vona i vo, 'Asiau wata tutuya i mimai kebu tamu aitoi vuagimu i na 'ani'ania,” we'e yana tovetutuyamavo yana vonanina 'ala'ai 'waineye i nogai.

Iesu i nago vanuga 'eba velu'ui 'waineye.

¹⁵ Tutuyanina i le'wai Ielusalema, Iesu i luku vanuga 'eba velu'ui nageneye i 'isedi tokimwane wata tovekimwane, matatabudi i sogiedi i obu. Wata mani tulina tulina 'adi tosivedavedamana† yadi talalia i tutuviladi wata bunebune 'eba velomu faifaidi 'adi tosivedavedamana yadi 'eba miabui i tutufelegeledi. ¹⁶ Kebu tamu aitoi i da tauyeni bega tamu kukua i na lukuveni vanuga 'eba velu'ui 'waineye. ¹⁷ ✧Iesu yana ve 'waineye i vonedi i vo, Basenadiotoga Yaubada yana Buki 'waineye i kilumi, Yaubada i vo,

Yaku vanuga 'ana wagava vanuga 'eba velu'ui tomotoga 'aila'a tulina tulina faifaidi,”

siwe 'omi 'wa sivilai, tovainago yadi 'eba giva.” ¹⁸ ✧Tovelomu 'adi to'edakumetavo wata ve'etoboda 'adi tovevo 'akonadi i nogai i kololo bega 'aise'avadi i veifufu bani'odi i na munega Iesu i na luvewafai. I kolologa fai tomotoga

✧ **11:14:** Mak 11:20 † **11:15:** Me Loma yadi mani kebu 'ana fata 'wainega i na 'anivelena-maimaiga bega i sisivedamana nuanuadi me Diu yadi mani. ✧ **11:17:** Ais 56:7 ✧ **11:18:** Mak 14:1

matatabudi nuanuadi Iesu we'e yana ve faifaina nuadi i voganidi. ¹⁹ 'Akonadi inala i simwanuya, bega Iesu ma yana tovetutuyamavo Ielusalema i 'iaweni i viladi i nagoi Bedani.

Iesu i ve 'ala'ai 'wainega.

²⁰ ✧ 'Awa'awaie Iesu ma enavo i nunagoi i 'iseni 'ala'ai matatabuna i 'awagi'ai. ²¹ Fita nuana i 'anita'ia bega Iesu i voneni i vo, Tove, 'ala'ai 'u voneniga 'akonadi matatabuna i 'awagi'ai.”
²²⁻²³ ✧ Iesu yana tovetutuyamavo i vonedi i vo, A vona mogitana, 'ai'edi tamu tomotoga ma yana vetumagana Yaubada 'waineye, 'ana fata de'e 'Oya Olive i na voneni i na obu eyage. 'Ai'edi kebu ma yana venuanaluga, i na vona ma yana vetumagana, naninina faifaina i vonaga i na souyeni.
²⁴ ✧ Faifainanina a na vonemi 'wa na velu'uiga Yaubada 'waineye 'wa na voneni ava'ai nuanuami. 'Ai'edi 'wa na vetumagana naninina nuanuami 'akonadi 'wa veluugaiga, mogitana Yaubada i na velemini. ²⁵ ✧ Tutuyanina 'wa na vevelu'ui, 'ai'edi ma yami nuasako tamu tomogo 'waineye, nagami 'wa nuatavuni, bega Tamada abame yami sakona i na nuatavunidi. ²⁶ We'e kebu 'wa na nuatavuniga, wata Tamada abame yami sakona kebu i na nuatavunidi.”

I velutolieni Iesu yana veimea lamuna.

²⁷⁻²⁸ ✧ Wata i viladi i maia Ielusalema. Tutuyanina Iesu i nunago vanuga 'eba velu'ui nageneamo, tovelomu 'adi to'edakumetavo, ve'etoboda 'adi

✧ **11:20:** Mak 11:14 ✧ **11:22-23:** Luk 17:6 ✧ **11:24:** Mad 7:7; Ion 14:13-14 ✧ **11:25:** Mad 6:14-15 ✧ **11:27-28:** Ion 2:18

tovevo wata to'edakumeta 'au'auveadi i maia Iesu 'waineye i velutolieni i vo, Nuanuama 'a na 'asetai aitoi i vetunemu bega naninidi 'u 'i'idewadi, 'alo aitoi veimea i velemu?" ²⁹ Iesu i vo, Nuanuaku tamu velutoli a na velemini, 'ai'edi yaku velutoli 'wa na tutuliga, a na vonemi aitoi veimea i veleku bega nani de'e a 'i'idewadi. ³⁰ 'Wa na voneku Ioni Tobafitaiso aitoi veimea i veleni bega tomotoga i bafitaisodi? Yaubada 'alo tomotoga?"

³¹ To'edakumetanidi 'aise'avadi i veifufu i vo, Bani'odi ta na voneyedi? 'Ai'edi ta na vo, Yaubada veimea Ioni i veleni," 'ako i na vo, Vetuma awale kebu Ioni yana vona 'wa da vetumaganeni?" ³² ✧Wata kebu 'ada fata ta na vo, Tomotoga veimea Ioni i veleni." To'edakumetavonidi 'aila'a i kololoyedi, kebu nuanuadi Ioni i na awaobuobuyeni fai 'aila'a matatabudi i ve'awamogitana Ioni Yaubada yana Vona 'ana tolu'ivona. ³³ Begaidi yadi tutula Iesu 'waineye i vo, Kebu 'a da 'asetai." Iesu i vo, Vetuma kebu a na vonemiga aitoi veimea i veleku bega nani de'e a 'i'idewadi."

12

Tofolova sakoidi 'adi vona-awatabai.

¹ Mulieta Iesu i vona-awatabai 'waidie i vo, Tamu tomogo kalefa talagina i yatoi wata i kalieni. Vuagina 'ana 'eba vatanitani i 'idewai kileuyega, wata kileu i didigi tabwaneye 'eba 'atu'ai i yogoni. I 'a'avana, tofolovavo i vonedi i na 'isave'avini, we'e i tauya i nago mali 'awalaweye. ² Kalefa yana kumaga 'ana tutuya i le'wa, tonibakula tamu

✧ 11:32: Mad 21:46

yana tofolova i voneni i nago yana bakula 'ana to'isave'avinavo 'waidie, vuaga 'ifwaidi i na miedi faifaina. ³ To'isave'avinanidi tofolova i 'ive'avini i nikei i vevilai nima'ava'avana.

⁴ Mulieta wata tamu tofolova i vetunei. Tofolovanina 'unu'ununeye i 'aitalaga wata i 'ivekokovaotogi. ⁵ Wata tamu i vetuneiga i luvewafaotogi. Wata fuedi i vetunedi, 'ifwaidi i nikedimo we'e 'ifwaidi i luvewafadi.

⁶ Aitamogana i miamia bega 'eba ve'a'avaotoga i vetunei taunina natuna nuafouna i vo, De'e natuku i na ve'ililibuyeni.” ⁷ Siwe

to'isave'avinanidi i 'iseni i mimai 'aise'avadi i veifufu i vo, No'o tonibakula natuna, bola nani matatabuna i na 'ewadi i na veimeyedi. 'Wa maia ta na luvewafai bega naninidi ta na 'ewadi.”

⁸ ✧ I 'ive'avini, i luvewafai i taweni kalimulie.”

⁹ Mulieta Iesu me Diu to'edakumeta i velutoliedi i vo, Tonibakula, yana to'isave'avinavo bani'odi i na munegidi? I na vilai to'isave'avinanidi matatabudi i na leodi mulieta tomotoga 'ifwaidi i na vonedi i na veto'isave'avina.” ¹⁰ ✧ Mulieta Iesu tamu vona-vagata Yaubada yana Buki 'wainega i voneyeni 'waidie to'edakumetanidi i na baileniga faifaina. I vo, 'Omi 'wa da vo de'e vonanina kebu 'wa da lu'iawawaiga i vo,

To'aiyogona folova tamu i 'iseni siwe i baileni.

Folovanina taunina 'unututu.

¹¹ Yada 'Auea folovanina i vetovoi-vaitugani, 'Ana 'isa 'waideye 'eba nua'ewa.”

¹² Me Diu yadi to'edakumetavo i 'asetai Iesu i vona-awatabaiedi taunidi bani'odi to'aiyogonanidi wata to'isave'avinavo sakoidi,

igodi i da 'ive'avini, siwe kebu 'adi fata fai 'aila'a nuanuadi Iesu begaidi i kololo i baileni.

Velutoli takesi faifaina.

¹³ Mulieta me Diu yadi to'edakumetavo Diu totafalolo Falisi wata 'ifwaidi Kini Elodi 'ana 'aila'avo i vetunedi i nagoi Iesu 'waineye nuanuadi i na velutolieni bonana na nogai, 'ai'edi i na vekali 'adi fata i na 'ive'avini. ¹⁴ I maia Iesu i voneni i vo, Tove, yamu sauluva tonovidi, kebu 'u da vevekaliga. 'A 'asetamu tomotoga toketokedi kebu 'u da kololoyediga 'u lulumatanidi we'e tomotoga sakoidi kebu 'u da vivieyediga, siwe 'u veve mogitana Yaubada yana nuanua tomotoga 'waineye. ¹⁵ 'U da nuani, i lubwaineda 'ida me Diu ta na takesi Loma yadi toveimea bwaikina Sisa 'waineye 'alo kebu? Nuanuama 'a na 'asetai.”

Iesu yadi bavuseba 'akonadi i 'asetai begaidi i vonedi i vo, 'Omi tovekali, igodi 'wa sisiloloku. Maninina 'wainega ta yatoyato takesi, 'wa na mieni ta na 'iseni.” ¹⁶ Maninina i mieni i 'iseni i velutoliedi i vo, De'e mani 'waineye, aitoi 'anununa wata 'ana wagava?” I vo, Sisa.” ¹⁷ ✧ Bega Iesu i vonedi i vo, Vetuma 'ai'edi ava'ai Sisa faifaina, 'wa na 'aniveleneni 'waineye, we'e ava'ai Yaubada faifaina, 'wa na 'aniveleneni 'waineye.” Iesu yana vona i nogai, nuadi i voganidi.

Yawasa-vaitugana 'ana velutoli.

¹⁸ ✧ 'Ifwaidi Diu totafalolo 'adi wagava Sadusi i maia Iesu 'waineye, taunidi tovana igodina towafa kebu i na yawasa-vaitugana. ¹⁹ ✧ Tomotoganidi Iesu i velutolieni i vo, Tove,

basenadiotoga Mosese yada veimea i kilumi i vo, 'Ai'edi tamu tomogo i na wafaga siwe kebu natunavoga, 'wabulina taina i na nagidi bega kwakwama i na vetubugidi tatana 'ana wagava wata 'ana wauma faifaidi.”²⁰ We'e tamu tomogo ma tainavo 'adi 'aila'a 7, tulaiotogina i nagi kebu tamu natunaga i wafa.²¹⁻²² 'Wabula yadi bwa i nagia, kebu tamu natuna wata i wafa. 'Adi vetonu yadi bwa i nagidi, i nagoga taidiavo matatabudi 'wabulanidi taiadi i nagi. Mulieta 'eba ve'a'ava 'waineye vavine yawaidi i 'a'ava.²³ 'Omi 'wa vonaga 'awaie towafa matatabudi i na yawasa-vaitugana, 'aianina 'waineye aitoi mogitana yana vavine fai matatabudi taiadi i nagi?”

²⁴ Iesu yadi velutoli i tutuli i vo, 'Omi 'wa vekali mogitana fai Yaubada yana Buki wata yana toketokena 'wa bavuyedi.²⁵ Tutuyanina towafa i na yawasa-vaitugana nagi kebu, yadi sauluva bani'odi anelose abame.²⁶ ✧'Omi yami vona 'ana nogaya 'wa vo, Towafa kebu i na tovoi-vaitugana,” siwe a na vonemi. 'Ai'edi Mosese 'ana kilukiluma 'wa da lu'iawawa-dewai 'wa da 'iseni Yaubada i vonavona 'waimie yawasa-vaitugana faifaina. Yaubada i veifufu Mosese 'waineye 'ai-ala'alata 'wainega. I vo, Yau Ebelamo, Aisake, wata Iakobo yadi Yaubada.”²⁷ De'e bani'odi Yaubada i voneyediga fai tomotoganidi basenadiotoga i wafa siwe 'asiau ma yawaidi taiadi i miamiani. Begaidi egavo 'akonadi i wafaga 'asiau ma yawaidi i miamiani, kebu tamu aitoi wafawafanaga Yaubada mataneye. 'Omi 'wa vekaliotoga.”

✧ 12:26: Sou 3:2-6

Veimea bwaikaotogina.

²⁸ Tamu ve'etoboda 'adi tove taiadi, i nogai veifufunina. I 'iseni Iesu Sadusi yadi velutoli i tutula-atumaia, bega i velutolieni i vo, Veimeanidi Mosese 'wainega i maiga, ava'ai veimeaga mogitana bwaikina?" ²⁹ ☆ Iesu i vo, Side veimeanina bwaikina, i vo,

Me Isileli 'wa ve'wada a na vonemi,
'Auvea yada Yaubada, 'Auvea
'aitamogaotogina.

³⁰ 'Auvea yami Yaubada 'wa na nuakalikalieni mogitana nuamiega, 'anu'anunumiega, yami nu-anua 'waidiega wata tutuya fue di yami toketokena 'wa na tauyedi 'waineye."

³¹ ☆ Veimea bwaikina 'ana veluga side bani'odi, i vo,

Emiavo 'wa na nuakalikaliEDI taunimi 'ami nuakalikali bani'odi."

De'e veimeanidi 'ailuga bwaikidi, kebu wata tamu bani'odiga." ³² Ve'etoboda 'adi tove Iesu i voneni i vo, Tove, 'u vonaga 'atumai'avana. Mogitana 'aiseotogina Yaubada, kebu tamu wata'e. ³³ ☆ 'U vona mogitana Yaubada ta na nuakalikalieni nuadega, 'anu'anunuda 'waidiega, yada nu-anua 'waidiega wata yada toketokena ta na tautauyedi 'waineye. Edavo ta na nuakalikaliEDI taunida 'ada nuakalikali bani'odi. Velomu wata 'anivelena-maimaiga mogitana nani bwaikidi Yaubada 'waineye, siwe veimeanidi 'ailuga bwaikaotogidi."

³⁴ Iesu i nogai tomogonina i vona mogitana, faifainanina i voneni i vo, 'Omu 'akonadi taunimu

☆ 12:29: VeL 6:5 ☆ 12:31: Vei 19:18; Lom 13:9-10; Gal 5:14

☆ 12:33: Ose 6:6

'u tautauyemu Yaubada 'waineye bega sai'afoga i na veimeyemu.”

Iesu i vona'a'ava mulieta kebu tamu aitoi i da vetoketoke bega i na velutolieni.

Velutoli Yaubada 'ana Venua'ivina faifaina.

³⁵ Iesu vanuga 'eba velu'ui 'waineye i veve i velutoliedi i vo, Ve'etoboda 'adi tovevo i vonaga Keliso, taunina Yaubada 'ana Venua'ivina, Kini Devida tubuna. Awale bani'odi i voneyedi?

³⁶ ✧Basenadi 'Anu'anunu 'Atumaina yana venuayato 'wainega Devida i kilumi Yaubada 'ana Venua'ivina faifaina i vo,

Yaubada i vona 'aku Toveimea 'waineye, i vo,

Veimea a velemuga bega 'u na miabui 'aku 'atagiega.

I na nagoga 'amu gaviavo a na leodi bega 'u na veveimeyedi.”

³⁷ Keliso mogitana Devida 'ana wauma 'wainega i souyeni, siwe i vebwaika-'iaweni Devida, faifainanina Devida i ve'awa-Toveimea Keliso 'waineye.” 'Aila'a bwaikina Iesu yana vonanina i nogai sosoana.

Iesu i matakia ve'etoboda 'adi tovevo faifaidi.

³⁸ Iesu i veve 'waidie i vona i vo, 'Wa na 'isa'isa ve'etoboda 'adi tovevo, nuanuadi yaba kaleko manamanawedi i veve'wesenedi bega 'aila'a bwaikina ma yadi ve'ililibu i na vevekaiwa 'waidie.

³⁹ Nuanuadi to'edakumeta bwaikidi taiadi i na mimiabui 'eba miava'auta 'waidie wata sakali 'waidie nuanuadi i na mimiabui ma 'adi wagava taiadi. ⁴⁰ We'e 'wabu'wabulavo i

✧ **12:36:** Same 110:1; Fol 2:34-35

vevekaliedi yadi vanuga i eloelodi wata yadi velu'ui i lulumanamanawedi bega tomotoga i na subiadi, i na vo 'ako, Yaubada yana tofolovavo 'atumaidi.” Siwe bola 'adi vematavuloga bwaikaotogina i na veluagai Yaubada 'wainega.”

'Wabula yadi 'anivelena-maimaiga.

⁴¹⁻⁴² Iesu i miabui vanuga 'eba velu'ui nageneye 'eba yato lilivaneye, 'aila'a i 'ise'isedi mani i yatoyato 'eba yato 'waineye. 'Ai'aiwabu fuedi mani bwaikina i yato, we'e tamu 'wabula i vewekowekomaga mani 'ailuga 'wau'waugidi i yatodi. ⁴³ ☆Yana tovetutuyamavo i goledi i maia 'waineye i vonedi i vo, A vona mogitana tomotoga i yatoga 'eba yato 'waineye, 'wabulanidi bwaikaotogina i yato. ⁴⁴ 'Ifwaidi i yatoga siwe wata yadi mani bwaikina i 'eno'enovi, we'e 'wabulanidi yadi mani i lusaweni. Kebu wata tamu mani 'waidie i da 'eno'eno 'adi'adi faifaina.”

13

Iesu i vona vanuga 'eba velu'ui 'ana geu faifaina.

¹ Iesu wata yana tovetutuyamavo taiadi i sousouyedi vanuga 'eba velu'uiiega tamu yana tovetutuyama i voneni i vo, Tove, 'u 'iseni vanuga 'eba velu'ui, kileu bwaikaotogidi 'waidiega i yogoni, 'ana 'isa 'atumaiotogina.” ² ☆Iesu i vo, Vanuganina 'u 'ise'iseniga mogitana 'atumaina, siwe 'awaie 'ami gaviavo i na maia i na geuya, wata kileunidi bega i bibinaga i na tutuweali, matatabuna i na tubakabakaledi.”

Iesu i vona-vagata tutuya vitana faifaina.

3-4 Mulieta Iesu ma enavo i laka 'Oya Olive, bei i miabui i miamiani vanuga 'eba velu'ui we'e no'o bega kebu 'ani'ie Ielusalema 'wainega. Fita, Iemesa, Ioni wata Anidulu 'aisedie Iesu i voneni i vo, 'U na vonema ava'ai tutuyaga vanuga 'eba velu'ui i na geuya wata ava'ai tugusaga ta na 'iseni bega ta na 'asetai naninidi sai'afoga i na souyedi.”
 5-6 ✧Bega Iesu i vonedi i vo, 'wa na 'isa'isa bega kebu tamu aitoi i na vekaliemiga, fai tomotoga fue di i na mai 'aku wagavayega igodi i na vo, Yau 'asa'aiana Keliso, Yaubada 'ana Venua'ivina.”
 Yadi vonayega fue di i na vekaliedi. ⁷ Lilivamie vetalaga butu'aidi 'wa na noganogaidiga wata 'ani'ieyega vala'avadi, siwe a vovona-vagasemi, kebu nuafoumi i na veviga. Naninidi mogitana i na souyedi we'e fwayafwaya 'ana 'eba ve'a'ava bola. ⁸ 'Eba veimea bwaikidi wata 'eba veimea bwaikidi 'ifwaidi i na vevetalaga, we'e 'awalawa wata 'awalawa 'ifwaidi taiadi i na vevetalaga. We'e 'awalawa fue di 'waidie yoyoyo i na yueyue wata i na loka. Tutuyanina vavine i na vebutudiga veviga bwaikina i na vebaedi, wata bani'odi naninidi a veifufuyediga tutuyanina i na souyediga veviga wata 'we'wela i na velamu.

⁹ ✧'Wa na 'isa'isa, fai 'omi 'wa na vetolu'ivona faifaiku, tomotoga 'ifwaidi i na 'ive'avinimi i na nawemi yadi toveimea 'waidie. 'Eba miava'auta 'waidie i na toke i na fitalimi, toveimea bwaikidi wata kini matadie 'wa na tovoi 'wa na vonayavuga, bega 'ami fata Vala 'Atumaina faifaiku 'wa na lu'ivona. ¹⁰ ✧Siwe nagami Valan-

✧ 13:5-6: Mak 13:21-22; 1 Ion 2:18 ✧ 13:9: Mad 10:17-22

✧ 13:10: Mad 28:19

ina 'Atumaina yaku tomotoga i na lu'ageyeni tomotoga 'adi 'aila'a tulina tulina 'waidie, mulieta fwayafwaya 'ana 'eba ve'a'ava. ¹¹ We'e i na 'ive'avinimi i na nawemi vanuga 'eba yogona 'waineye, kebu nuafoumi i na veviga 'wa na vo, Bani'odi 'a na voneyedi?" Tutuyanina 'wa na vovonayavuga, ava'ai Yaubada i na vonemi, bani'odi 'wa na voneyedi. Vonanina 'omi kebu yami vona, 'Anu'anunu 'Atumaina 'wainega.

¹² Tomotoga fuedi yaku tomotoga i na vedumwe'ai'aiedi bani'odi 'ifwaidi tomotoga taidiavo 'alo tatadiavo i na 'anivelenedi 'aku tovedumwe'ai'ai 'waidie i na luvewafadi, we'e iaveta tulaidi 'ifwaidi natudiavo iavetadi i na 'anivelenedi i na wafa, wata yavayavava tamadiavo inadiavo taiadi i na vegaviedi bega i na wafa. ¹³ ✧Fai 'wa vetumagana 'waikuye begaidi tomotoga fuedi i na vedumwe'ai'aiemi, siwe egavo i na tokemaigedi i na nagoga tutuya 'eba ve'a'ava 'waineye 'ita'ita'i i na veluagai.

Tamu nani maigikokololona.

¹⁴ ✧(Buki tokiluma bonaku, Iesu yana vona de'e 'wa na lu'iawawaiga 'wa na venua'ivineni nika 'wa na 'asetai.) Wata Iesu i vonedi i vo, Bola tamu nani 'wa na 'iseni maigikokololona vanuga 'eba velu'ui nageneye i na tovofovi. Tutuyanina tugusanina i na souyeni, egavo i miamiani 'awalawa Iudia nageneye, i lubwainedi i na dega i na nagoi 'oyeye. ¹⁵⁻¹⁶ 'Ai'edi aitoi masi'edeye i na miamia, kebu 'ana fata i na luku vanuge yana kukua i na 'ewadi i na dega-matayo'o, wata

aitoi i nagoga bakule, kebu 'ana fata i na vilai i na mai vanuge 'ana kaleko 'ana 'ewa faifaina. ¹⁷ 'Aiatanidi 'waidie toveinainage wata vauvau, nuakalikalidi fai kebu 'adi fata i na dega-matayo'o veviga bwaikina i na veluagai. ¹⁸ Yaubada 'waineyeye 'wa na vevelu'ui bega naninidi kebu i na sousouyeni toalu'uye 'wei bwaikina 'ana tutuye. ¹⁹ ✧Yaubada fwayafwaya i 'idewavauyeni i maiga 'asiau veviga i sousouyedi siwe sai'afo, we'e 'aiatanidi 'waidie veviga bwaikaotogina i na souyeni, i na 'a'avana kebu wata bani'odi i na sousouyeni. ²⁰ Vitanidi de'e 'ana tutuya Yaubada i na 'ive'ale'usai, 'ai'edi kebu, tomotoga i na 'a'ava. Tomotoganidi Yaubada i venua'ivinediga faifaidi i na 'ive'ale'usai bega yadi mia i na ve'atumai.

Keliso-vekavekali i na souyedi.

²¹⁻²² ✧Tutuyanina 'waineyeye 'ai'edi aitoi i na vonemi i na vo, Sino'o, Keliso i le'wa," 'alo i na vo, Side taunina," kebu bonana 'wa na nogai 'wa na vo 'ako, Mogitana," fai keliso-vekavekali wata tolu'ivona-vekavekali i na sousouyedi. I na souyediga 'eba nuavogana wata 'eba nua'ewa i na 'i'idewadi, igodi nuanuadi tomotoganidi Yaubada i venua'ivinediga vekaliega nuadi i na 'ewadi. ²³ Naninidi 'awaie i na souyediga 'akonadi 'wa nogai, a vovona-vagasemi bega 'wa na 'isa'isa.

Iesu yana mai-vaitugana.

²⁴⁻²⁵ ✧Tutuyanina vitanina i na 'a'avana nika inala i na lu'waugi, weta'i yana mageta i na 'a'ava, 'ubwana i na avuta abamega,

✧ **13:19:** Dan 12:1 ✧ **13:21-22:** 2 Tes 2:9; Ve 13:13 ✧ **13:24-25:** 2 Fit 3:10; Ve 6:12-13

wata nani matatabuna toketokedi abame i na yue. ²⁶ ✧Tutuyanina 'waineye tomia fwayafwaya matatabudi i na 'iseku yau a vetomotogaotoga abamega a na mimai waowa 'wainega ma yaku toketokena wata ma magetaku mataududulina. ²⁷ ✧Bega yaku anelose a na vetunedi yaku tomotoga vevenua'ivinidi i na va'augidi bega i na luku Yaubada yana 'Aila'a 'waineye. Tomotoganidi i na miediga fwayafwaya matatabuna 'wainega, inala yana 'eba lakayega wata yana 'eba inivayega, bolimanayega wata yavalatayega.

²⁸ Modawa 'wa na nuani. Tutuyanina i na idiaga ta 'asetai 'aisaya i veyafa. ²⁹ Wata bani'odi 'ai'edi tugusanidi a voneyediga 'wa na 'isedi, 'wa na 'asetai yaku souyagi 'akonadi i le'wale'wa. ³⁰ A vona mogitana 'waimie, tutuya de'e 'ana tomotoga bola i na miamiani naninidi matatabuna i na souyedi. ³¹ Abama wata fwayafwaya 'awaie i na 'a'ava, we'e yaku vona kebu tamu sai'afo i na 'a'ava, i na 'eno-vagata.”

Iesu yana mai-vaitugana 'ana tutuya kebu tamu aitoi i da 'asetai

³² ✧Wata Iesu i vonedi i vo, Yaku mai-vaitugana kebu tamu aitoi i da 'asetai, ava'ai 'aiataga 'alo ava'ai 'awasasaga 'waineye a na vilaku. Anelose abame kebu i da 'asetai, 'alo yau Yaubada Natuna, Tamaku 'aiseotogina i 'asetai. ³³ ✧Fai 'omi kebu 'wa da 'asetai ma'avia nani de'e i na souyeni, 'wa na 'isave'avinimi wata 'wa na

✧ 13:26: Mad 26:64 ✧ 13:27: 1 Tes 4:16-17 ✧ 13:32: Fol 1:7

✧ 13:33: Mad 25:13

'isa'isa. ³⁴ Yaku le'wa side bani'odi. Tamu to-mogo i na nago 'ani'ie bega yana tofolovavo 'aitamogana 'aitamogana yadi folova i veledi, wata vanuga 'ana to'isave'avina i voneni i vo, 'U na 'isa'isa wata 'u na lulukamata.” ³⁵ ✧Wata 'omi bani'odi 'wa na 'isa'isa fai kebu 'wa da 'asetaigna ma'avina yau tonivanuga a na le'wa. Lav-ilavie, lovana 'ana utukamwana, tu'wa'wale, 'alo 'awa'awaie. ³⁶ Kebu nuanuaku a na le'wa a na 'isemi 'wa na 'eno'eno a na veyawailovogimi. ³⁷ Ava'ai a voneyeni 'waimie, wata bani'odi to-motoga matatabudi a vonedi, 'wa na 'isa'isa.”

14

I luala Iesu 'ana laugiva faifaina.

¹ ✧Aiata 'ailuga i na 'a'ava, mulieta Uvi'agalatagona 'ana sakali i na 'idewai. Sakalinina 'waineye me Diu beledi kebu 'ana 'ivebwaika i 'ani'ani, 'adi 'eba tolinuata'i basenadiotoga Yaubada tubudiavo i 'ita'ita'iedi 'awalawa Itifita 'wainega. Tutuyanina 'waineye me Diu yadi tovelomu 'adi to'edakumetavo wata ve'etoboda 'adi tovevo i veifufu bani'odi i na munega givagivayega Iesu i na 'ive'avini i na luvewafai. ² Siwe wata i vo, Kebu sakalie ta na 'ive'aviniga i na nunago egavo nuanuadi Iesu, i na nuasako i na daba.”

Iesu 'ana iwaga.

³ Iesu bola i miamia 'atamana Bedani, Saimoni yana vanuge, taunina basenadi waiwaiseselina. I

'ani'ani nika tamu vavine bunama i mieni, magaina 'atumaina wata 'ana tutula bwaikina. Bunamanina 'ana wagava Nadi, we'e bei i koiaga kileu i 'idewai 'ana 'isa 'atumaiotogina, 'ana wagava alibasita. Bega bunamanina 'odona i tutubaia Iesu nava'auna i iwagi.

4 Tomotoga 'ifwaidi i 'iseni, ma yadi nuasako i luvulewa i vo, Awale bunama i ve'amubwadodoyeni? 5 I lubwaineni i da vekimwaneyeni bega mani bwaikina i da veluagai bani'odi lubulubu 300,* 'wainega wekówekoma i da 'ivaisedi.” Faifainanina vavine i yagaia.

6-7 Iesu i vonedi i vo, 'Asa'aiana, 'wa 'ailove, vavine kebu 'wa na 'ivebunumayagi. Naninina i 'idewaiga 'waikuye 'atumaiotogina i lubwaineni, we'e wekówekoma tutuya fueidi taiadi 'wa na mi-amiani, tutuyanina nuanuami 'ami fata 'wa na 'ivaisedi. We'e yau kebu tutuya manamanawena taiadi ta na miamia. 8 ✧ Vavine de'e yana 'aivaita 'waikuye bwaikina siwe kebu wata tamu ava'ai bega i na 'idewai 'waikuye. Bunama i iwagi tomogoku i 'idewa-vagaseni 'aku ve'ufa faifaina me Diu yada sauluva bani'odi. 9 A vona mogitana, bola Valaku 'Atumaina i na lulu'ageyeni fwayafwaya matatabuna 'waineye vavine de'e yana folova 'waikuye wata i na lulu'ivoneyeni 'ana 'eba nuave'avina.”

Judasa nuanuana Iesu i na 'etogiluvini.

* 14:5: 'Ana mogitana me Diu yadi mani Denali 300, bani'odi malamala 'aitamogana 'ana folova tutulina. ✧ 14:8: Ion 19:40

¹⁰ Iesu i iwagi i 'a'avana, mulieta tamu yana tovetutuyama 'ana wagava Iudasa Isakaliota i nago tovelomu 'adi to'edakumetavo 'waidie nuanuana Iesu i na 'etogiluvani 'waidie bega i na luve-wafai. ¹¹ Iudasa yana vonanina i nogai i sosoana i vona'awaufaufa 'waineyeye tutula i na veleni. Bega Iudasa i luala 'eda'eda 'atumaina 'wainega Iesu i na 'aniveleneni.

Iesu ma yana tovetutuyamavo i 'ani.

¹² ✧ Sakali Uvi'agalatagona 'ana 'aiata 'eba velamu 'waineyeye, beledi kebu 'ana 'ivebwaika i 'ani'ani, wata 'aisaya sifi natudiavo i nikenikedi i vevelomuyedi sakalinina faifaina. 'Aiatanina 'waineyeye, tovetutuyamavo Iesu i velutolieni i vo, Ava'aibe bei nuanuamu yada sakali 'ani'aninina 'a na 'idewadewa?" ¹³ Bega Iesu yana tovetutuyamavo 'adi 'ailuga i vonedi i vo, 'Wa na nagoi Ielusalema nageneyeye, tamu tomogo ma yana 'eba koi ufa i veadagi 'wa na veluagai i na nunago tamu vanuga 'waineyeye 'wa na yogo'waili. ¹⁴ Vanuganina 'waineyeye i na lukuga tonivanuga 'wa na velutolieni side bani'odi 'wa na voneyedi, Yama Tove i vo, Ava'aibe yaku tududaba bei yaku tovetutuyamavo taiadi 'a na 'ani Uvi'agalatagona faifaina?" ¹⁵ Bei tonivanuga i na vemi tamu tududaba bwaikina tabwaneyeye 'akonadi i 'idewai faifa. Bei 'ada'ada 'wa na 'idewadewa." ¹⁶ Tovetutuyamavo 'adi 'ailuga i nagoi 'atamana bwaikineye naninidi Iesu i voneyediga matatabuna i veluagadi nika bei sakali i 'idewadewa.

17-18 ✧ Inala i simwanuya Iesu ma yana tovetutuyamavo 12 taiadi i maia, i luku vanuge i na 'ani. Yadi 'aninina 'waineye Iesu i vo, A na vonemi, tamu 'waimiega i na 'etogiluveku, taunina ma fueda ta 'ani'ani.”¹⁹ Tovetutuyamavo yana vona i nogai nuafoudi i veviga 'aitamogana 'aitamogana i vevelutoli i vo, 'Auvea, voke yau, siwe a nuani kebu.”²⁰ Iesu i vo, 'Ami 12 nagemiega 'aitamogana i na 'etogiluveku. Taunina 'ama 'ailugana 'ama beledi 'a lulu'utuva 'aivoeye siwe kumanina.²¹ Basenadiotoga i kilumi Yaubada yana Buki 'waineye yau a vetomotogaotoga i na nikeku a na wafa, i vonaga mogitana, we'e yau a vetomotogaotoga 'aku to'etogiluva nuakalikalina. 'Ako kebu i da tubugaga 'atumaina, siwe fai i tubuga yana sakonanina faifaina veviga bwaikina i na veluagai.”

Iesu yana 'ani.

²² Tutuyanina i 'ani'ani Iesu 'ani'ani i 'ewai i vekaiwa Yaubada 'waineye mulieta i 'ivivia i 'a'avana yana tovetutuyamavo i veledi. I vonedi i vo, 'Ani'ani de'e 'asa'aiana tomogoku. 'Wa na 'ewai 'wa na 'ania.”

²³ Mulieta oine ma vedina i 'ewai, Yaubada 'waineye i vekaiwa, i veledi matatabudi i yemu.²⁴ ✧ Bega Iesu i vona i vo, Oine de'e 'asa'aiana dayagiku, i na ilolo fuemi faifaimi. Yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie.²⁵ A vona mogitana 'waimie, oine de'e kebu wata a na yemuga, i na nagoga mulieta oine

✧ 14:17-18: Same 41:9 ✧ 14:24: Sou 24:8; 1 Kol 10:16; Ion 6:54-56

'ivauna a na yemu Yaubada yana 'Eba Veimea nageneye.”²⁶ Iesu i vona'a'ava lei subisubia tamu i silakai i lei mulieta i nago i laka 'Oya Olive.

Iesu i vona-vagata Fita i na ve'eweniga faifaina.

²⁷ ✧ Iesu i vona yana tovetutuyamavo 'waidie i vo, 'Ako matatabumi 'wa na degaloveku fai base-nadiotoga Yaubada yana Buki 'waineye i kilumi faifaimi i vo,

Yaubada to'isave'avina i na nikei i na wafa, we'e 'aisaya sifi i na ve'aladegadega.”

²⁸ ✧ Vonanina i kilumiga i na nikeku faifaina mogitana, siwe tutuyanina Yaubada i na sive-tovoiku a na kumeta a na nago Galili bei ta na veluaga.”²⁹ Fita i vona-matayo'o i vo, 'Ai'edi tomotoga matatabudi i na degalovemu, we'e yau kebu a na degalovemuga.”³⁰ ✧ Iesu Fita i voneni i vo, A vona mogitana 'waimuye 'ako lovane tutuya 'aitonu 'u na bavusebeku mulieta kamukamu 'ana veluga i na kwage.”³¹ Nika Fita i ve'awafatafata i vo, 'Ai'edi taiadi ta na wafaga i lubwaineku, siwe kebu a na vo, Yau Iesu kebu a da 'asetaigna.” Ava'ai Fita i voneyeniga, enavo matatabudi wata bani'odi i vona.

Iesu i nago Gedesemani bei i velu'ui.

³² Mulieta Iesu ma yana tovetutuyamavo i nagoi tamu wala'ai 'atumaina 'waineye 'ana wagava Gedesemani, bei yana tovetutuyamavo i vonedi i vo, Side bei 'wa na miabui 'wa na miamiani, yau sino bei a na nago a na velu'ui.”³³⁻³⁴ ✧ Tomotoga 'adi 'aitonu i vonedi taiadi i nagoi, Fita, Iemesa

✧ **14:27:** Ion 16:32; Sek 13:7 ✧ **14:28:** Mak 16:7 ✧ **14:30:** Mak 14:66-72 ✧ **14:33-34:** Ion 12:27; Ibu 5:7-8

wata Ioni. Venuafouviga wata nuavita bwaikina Iesu i vebaeni i vonedi i vo, Yaku nuavita bwaikao-togina 'wa da vo nuafouku i da 'e'etokadia wata 'wainega sai'afoga a na wafa. Side bei 'wa na miamia kebu 'wa na 'enoga 'wa na 'isa'isa.”

³⁵ I vaganago i lumata'afufu i velu'ui Tamana 'waineye 'ai'edi i na lubwaineniga 'ana vitanina i da 'ewai 'wainega. ³⁶ ✨I vo, Ie Tamaku, nani matatabuna 'waimuye safailidi, veviganina wata wafa 'u da 'ewadi 'waikuyega. Siwe 'asa'aiana, de'e kebu yau yaku nuanuaga, 'omu yamu nu-anua bega a na vematayakeyakenimo.”

³⁷ I velu'ui i 'a'avana i vilai i nago yana tovetutuyamavo i 'isedi i 'eno'enovi. I luvagonidi Fita i voneni i vo, Saimoni, awale 'u 'eno'eno, 'u da 'isa'isa 'awasasa 'aitamogana. ³⁸ 'Wa na 'isa'isa wata 'wa na vevelu'ui nika kebu vetalaim-imila 'waineye 'wa na be'uga. Nuanuami 'wa na 'ivaiseku siwe yami toketokena i mwea.”

³⁹ Wata 'ana veluga Iesu i vaganago yana velu'uinina i luvaitugani. ⁴⁰ Wata i vilai i mai yana tovetutuyamavo i 'isedi i 'eno'enovi fai matadi i duduna-'afo'afo. I luvagona-vaituganidi siwe kebu tamu ava'ai i da voneyeniga fai i bunumayaga. ⁴¹⁻⁴² Wata i 'iawedi i vilai i nago i velu'ui, mulieta yana vila 'ana vetonu 'waineye i mai yana tovetutuyamavo i luvagonidi i vonedi i vo, 'Omi 'alo 'wa 'eno'enovi. 'Asa'aiana, siwe 'wa 'isanaweni, 'aku to'etogiluva i le'wa. Yau a vetomotogaotoga yaku tutuya 'akonadi i le'wa bega i na 'aniveleneku tosakona yadi toketokena 'waineye. 'Wa tovoi ta na nagoi 'waidie.”

✨ **14:36:** Ion 6:38

Iesu 'ana 'ive'avina.

⁴³ Bola Iesu i veveifufu nika Iudasa i mai, kumanina tamu Iesu yana tovetutuyamavo 12 'waidiega. 'Aila'a bwaikina taiadi i maia, ma yadi kefata wata fulumai, tovelomu 'adi to'edakumetavo, ve'etoboda 'adi tovevo wata me Diu yadi to'edakumetavo 'au'auveadi 'waidiega i vetunedi i maia.

⁴⁴ To'etogiluvanina 'akonadi 'aila'a i vona-vagasedi yana tugusa i vo, Tomogonina a na 'avalamaigiga, kumanina nuanuami, 'wa na 'ive'avini 'wa na naweni.” ⁴⁵⁻⁴⁶ Tutuyanina i le'wai Iudasa tonovina i nago Iesu 'waineye, i vo, Tove, kaiwa,” nika i 'avalamaigi, bega 'aila'a Iesu i tovififineni i 'ive'avini. ⁴⁷ Iesu yana 'aila'a 'wainega tamu tomogo yana kefata i yo'ei tovelomu bwaikina yana tofolova igodi i da nikei, taniga'avana i tutuomuya. ⁴⁸ ✧Tomotoganidi i maia Iesu 'ana 'ive'avina faifaina i vonedi i vo, Yau 'wa da vo to'ainike bega 'wa maia ma yami kefata wata fulumai 'aku 'ive'avina faifaina. ⁴⁹ 'Aiata 'aitamogana 'aitamogana a mimiabui vanuga 'eba velu'ui nageneye a veve siwe kebu bei 'wa da 'ive'avinikuga. Siwe de'e naninidi 'wa 'i'idewadiga 'waikuye nika ava'ai basenadiotoga Yaubada yana tolu'ivonavo i kilumi faifaiku yana Buki 'waineye, 'ana mogitana i souyeni.” ⁵⁰ ✧Iesu i vona'a'avana yana tovetutuyamavo matatabudi i degalovei.

⁵¹⁻⁵² Tamu tubuau ma 'ana kaleko sulu Iesu i yogo'waili, Iudasa yana 'aila'avo i 'iseni nuanuadi

i na 'ive'avini nika i yaibamui 'ana kaleko'ava i 'ewai, we'e konekonena i dega.

Iesu i tovoi Diu Kaniselo matadie.

⁵³ Mulieta Iesu i mieni tovelomu bwaikina yana vanuge. Vanuganina 'waineye Diu yadi to'edakumetavo 'au'auveadi, tovelomu 'adi to'edakumetavo, wata ve'etoboda 'adi tovevo i va'auta Iesu yana vonayavuga i na nogai. ⁵⁴ Fita i yogo'waila siwe 'ani'ieogose kebu lilivadie, i nago i luku vanuganina 'ana kali nageneye, tanotanoge i miabui tolugaviavo taiadi, 'ai-'ala'alata 'waineye i vevevala.

⁵⁵ Vanuganina nageneye tovelomu 'adi to'edakumetavo wata 'ifwaidi Diu yadi Kaniselo Iesu yana vonayavuga i noganogai nuanuadi vekaliega i na luvewafai, siwe kebu tamu yana sakona i da velugaiga. ⁵⁶ Bega tomotoga fuedi i lu'ivona-vekavekali siwe yadi vonanidi kebu i da vesala.

⁵⁷⁻⁵⁸ ✧ Mulieta 'ifwaidi i tovoi i vekali i vo, Tamu tutuya 'a nogai Iesu i vo, Vanuga 'eba velu'ui tomotoga i yogoniga a na geuya, wata 'aiata 'aitonu nagedie tamu a na yogoni, siwe kebu tomotoga 'adi 'a'aiyogona.” ⁵⁹ Siwe wata tomotoganidi yadi vonanidi tulina tulina, kebu i da vesala.

⁶⁰ Tovelomu bwaikina i tovoi matadie Iesu i voneni i vo, I vevitamuga, bonadi 'u tutuli, i vona mogitana 'alo kebu?” ⁶¹ ✧ Siwe Iesu kebu tamu ava'ai i da voneyeniga i veve'wada. Wata tovelomu bwaikina i velutoli-vaitugana Iesu 'waineye i vo, Mogitana 'omu Keliso, Yaubada 'ana Venua'ivina wata Natuna 'alo kebu?”

✧ **14:57-58:** Ion 2:19-21 ✧ **14:61:** Mak 15:5; Ais 53:7

62 ✧Tovelomu bwaikina yana velutoli Iesu i tutuli i vo, E'e. 'Awaie yau a vetomotogaotoga 'wa na 'iseku ma yaku veimea Yaubada Bwaikaotogina 'ana 'atagie a na miabui, wata abamega a na obuobuma waowa 'wainega.”

63-64 ✧Iesu yana vona faifaina tovelomunina ma yana kamogala 'ana talauma i silabu'i i vo, 'Wa nogai? I vona-awadamana Yaubada 'waineye, tovevita 'ifwaimi 'asa'aiana, kebu 'wa na von-avonaga. We'e 'omi 'wa da nuani, i na wafa 'alo kebu?” Kaniselo matatabudi yana vona i tutuli i vo, Yana vonanina 'ana nogaya i lubwaineni wafa.” 65 ✧Mulieta 'ifwaidi i kiwakiwali i 'a'avana matana i umadina nimadi i nunumidi i nikei wata i sidibidibieni i vo, 'Omu igodi Yaubada yana tolu'ivona, yama fio, 'u da nuaniga aitoi i nikemu?” I 'a'avana tolugaviavo i vagavaia i nunaweni i nikenikei.

Fita i ve'eweni Iesu.

66-67 We'e Fita i miamia tanotanoge, tamu vavine tovelomu bwaikina yana tofolova i souyeni, Fita i 'iseni i vevevala i 'i'isadewai i 'a'avana i voneni i vo, 'Omu wata Iesu Nasalediega yana 'aila'a.” 68 Siwe Fita i ve'ewa i vo, Yau kebu. Ava'ai 'u vonevoneyeniga kebu a da 'asetai.” Bega Fita i vaganago kali 'awaneye nika i nogai kamukamu i kwage.

69 Wata tofolovanina i 'iseni Fita i tovtovoi, 'ifwaidi tomotoga 'waidie i vo, Sino tomogonina, Iesu yana 'aila'a tamu.” 70 Siwe Fita i nogai i ve'ewa-vaitugana i vo, Yau kebu.” Tutuya siaina

✧ 14:62: Mak 13:26; Dan 7:13 ✧ 14:63-64: Ion 19:7; Vei 24:16

✧ 14:65: Ais 53:5

i 'a'ava wata 'ifwaidi tomotoga lilivaneye i tovo-tovoiga i voneni i vo, Mogitana, 'omu tamu Iesu yana 'aila'a fai 'u mai 'awalawa Galili 'wainega.”

⁷¹ Nika Fita i ve'awafatafata i vo, 'Ai'edi a da vevekaliga, Yaubada i da nikeku, we'e aigodi, to-mogonina kebu a da 'aset-tonovi.”

⁷² ✧Fita i vona'a'ava nika kamukamu 'ana veluga i kwage. I nogai, i nuani Iesu yana vona i voneniga i vo, 'Ako lovane tutuya 'aitonu 'u na bavusebuku mulieta kamukamu 'ana veluga i na kwage.” Fita vonanina i nuani i taibwaubwau.

15

Iesu i vona-yavuga Failato mataneyeye.

¹ 'Awa'awaiogose Diu yadi Kaniselo i va'auta tovelomu 'adi to'edakumetavo, to'edakumeta 'au'auveadi wata ve'etoboda 'adi tovevo taiadi. Matatabudi i veifufu bega yadi nuanua 'aitamogana Iesu i yogoni i naweni i 'aniveleneni Loma gabemani yadi toveimea Failato 'waineyeye.

² Bega Failato Iesu i velutolieni i vo, 'Omu me Diu yadi kini?” Iesu i vo, 'Asa'aiana 'u vona bani'odi.” ³ Siwe tutuyanina tovelomu 'adi to'edakumetavo i vevevita-maimaigiga Iesu kebu i da vonavona i veve'wadamo. ⁴ Begaidi Failato i voneni i vo, I vevevitamuga nani tulina tulina 'waidiega 'u noganogai 'alo kebu?” ⁵ ✧Siwe Iesu i baila kebu nuanuana vonanidi i na tutulidi begaidi Failato nuana i vogani.

Failato i veimea Iesu i na wafa.

✧ 14:72: Mak 14:30 ✧ 15:5: Mak 14:61; Ais 53:7

6 Malamala 'aitamogana 'aitamogana me Diu i sakasakali Uvi'agalatagona faifaina. Sakalinina 'waineye me Diu fuedi tamu iadi yogoyogonina i vevenua'ivineni bega gabemani i 'e'etoyavuya vanuga 'eba yogona 'wainega. 7 Tutuyanina 'waineye tamu tomogo 'ana wagava Balaba i miamia vanuga 'eba yogona nageneye, taunina to'ainike ma enavo Loma gabemani taiadi i vetalaga. 8 Tutuyanina Iesu i tovtovoi Failato mataneye, tomotoga fuedi i nagoi Failato 'waineye i velu'ui nuanuadi tamu tomogo i na 'etoyavuya Uvi'agalatagona 'ana sauluva bani'odi. 9-10 ✧Failato i 'asetai tovelomu 'adi to'edakumetavo Iesu i ve'unumagigieni i 'aniveleneni 'waineye begaidi i vonedi i vo, Nuanuami me Diu yami kini a na 'etoyavuya?" 11 ✧Siwe tovelomu 'adi to'edakumetavo tomotoga nuadi i 'anidi bega Failato i na voneni Balaba i na 'etoyavuya we'e Iesu kebu.

12 Failato i velutoli 'waidie i vo, Kumanina 'wa golegoleni me Diu yami kini, bani'odi a na munegi?" 13 Nika 'aila'a bwaikina i vegole i vo, 'U tutufwaseni 'ai lagalagana 'waineye bei i na wafa." 14 Wata Failato i velutoliedi i vo, Yana sakona ava'ai?" Siwe 'aila'anidi i toke i vegolegole i vo, 'U tutufwaseni 'ai lagalagana 'waineye." 15 Failato nuanuana tomotoga i na 'ivenua-agiagidi begaidi Balaba i 'etoyavuya, we'e i veimea tolugaviavo Iesu i na toke i na fitali mulieta i na naweni i na tutufwaseni 'ai lagalagana 'waineye, bega bei i na wafa.

✧ 15:9-10: Ion 11:47-48, 12:19 ✧ 15:11: Fol 3:14

Tolugavia Iesu i sidibidibieni.

¹⁶ Vona-yavuga i 'a'avana, Iesu i lukuveni tamu tutudaba bwaikina 'waineye Failato yana vanuga nageneye, bei tolugavia matatabudi i va'auta. ¹⁷ ✧Tolugavianidi kaleko yamoyamoinega Iesu i ve'weseni wata fisili ma yana 'ibadi i 'etofifini 'unu'ununeye i biuleni. Vaigavunidi kini 'adi vaigavu bani'odi siwe 'waidiega Iesu i sidibidibieni. ¹⁸ Bei i ve'ililibu-vekavekali i vo, Kaiwa, 'omu me Diu yadi kini." ¹⁹ ✧'Uwe 'wainega 'unu'ununa i nikenikei, i kiwakiwali, wata igodi ma yadi subia i 'odu'odu mataneye. ²⁰ Yadi sidibidibi i 'a'avana, kalekonina i ve'weseniga i yavuya wata taunina 'ana kalekoyega i ve'weseni. Bega vanugayega i souyedi i naweni i na tutufwaseni 'ai lagalagana 'waineye.

Iesu 'ana tutufwatagi.

²¹ Tutuyanina Iesu i nunaweni 'edeye, tamu to-mogo i veluagai 'ana wagava Saimoni kwedayega i tauya i mimai Ielusalema. Saimoni tomogo Sailini, natunavo 'adi 'ailuga iavetadi Alekisana, wata Lufusa. Tolugaviavo Saimoni i lukakadeni Iesu 'ana 'ai lagalagana i eva. ²² Bega i nagoi i le'wa tamu 'awalawa 'waineye 'ana wagava Golig-ota, 'ana saivila 'Unu'unu Lulu'ava. ²³ Bei oine i 'idewai tamu konini 'ana wagava Mulo taiadi i veleni i na yemu bega 'ana kini'ona kebu i na veviga, siwe i baila veviganina faifaina i tauyeni. ²⁴ ✧Mulieta i tutufwaseni 'ai lagalagana 'waineye, i 'a'avana tolugaviavo nuanuadi Iesu 'ana kaleko i

na veusedi begaidi tamu 'wawa i 'waveni bani'odi kate. 'Ai'edi aitoi i na kumetaga ava'ai kalekoga nuanuana i na 'ewai.

²⁵ Tutuyanina Iesu i tutufwaseniga 'awa'awaie, 9 kiloki 'waineye. ²⁶ 'Ana 'ai lagalagana tab-waneyeye vonanina 'wainega i vevitaiga i kilumi i tutufwaseni i vo,

TOMOGO DE'É ME DIU YADI KINI.

²⁷ Wata tovainago 'adi 'ailuga i tutufwasedi, tamu Iesu 'ana 'atagiega, tamu 'ana wamayega. [28 ✧Nika 'ana mogitana i souyeni basenadi Yaubada yana Buki 'waineye i kilumi vonanina i vo, Taunina ma fuedie tosakona.”] ²⁹⁻³⁰ ✧Tomotoga 'ai lagalagana lilivaneamo i nunagoi i veveugalewalewa wata i yagayagaia i vo, 'Amu 'isa, 'u vonaga igodi vanuga 'eba velu'ui 'u da geuya wata 'aiata 'aitonu nagedie 'u da yogona-vaitugani. 'Ai'edi vonanina mogitana, nika taunimu 'u 'ita'ita'iemu 'ai lagalaganega 'u obuma.”

³¹⁻³² Wata bani'odi tovelomu 'adi to'edakumetavo, wata ve'etoboda 'adi tovevo 'aise'avadi i sidibidibieni i vo, Tomotoga 'ifwaidi i 'ita'ita'iedi siwe kebu 'ana fata taunina i na 'ita'ita'ieni. Taunina igodi Yaubada 'ana Venua'ivina wata me Isileli yada Kini, siwe 'ai'edi 'asiauotoga i na obuma 'ai lagalaganega ta na 'iseni ta na ve'awamogitana. Wata tovainagonidi taiadi i tutufwasediga i manini Iesu 'waineye.

Iesu i wafa.

³³ 'Aiata 'ana utukamwana 'waineye fwayafwaya matatabuna i dudubali, mulieta

✧ 15:28: Ais 53:12 ✧ 15:29-30: Same 22:7; Ion 2:19

lavilavie bani'odi 3 kiloki i magetai.
³⁴ ✧ 'Awasasanina 'waineye Iesu i toke i vegole me Diu bonadiega i vo, Iloi, Iloi, lema sabakitani," 'ana saivila, Yaku Yaubada, yaku Yaubada, awale 'u bailaotogeku?" ³⁵ 'Ifwaidi tomotoga i tovoivoiga bonana i nogai i vo, 'wa nogai? Ilaitia i golegoleni, nuanuana abamega i na mai i na 'ivaiseni." ³⁶ ✧ Tamu tomogo i lilide i nago kikifa i lu'utuvi oine yuyuna 'waineye, tamu 'ai 'waineye i velugaganeni i 'iyoyoeni Iesu 'waineye nuanuana i na yemu. Nika 'ifwaidi i vo, 'U ve'wada, nagami ta na 'iseni voke Ilaitia i mimai i na 'ita'ita'ieni."

³⁷ Mulieta Iesu i toke i vegole nika yawaina i 'awatagoni.

³⁸ ✧ Vanuga 'eba velu'ui nageneye tamu kaleko bwaikina Yaubada yana tutudaba tabutabuotogina i sisibodeni. Tutuyanina Iesu yawaina i 'a'avaga kalekonina i 'anilabu'alugedi, tabwanega i obu dibuneye, nika bani'odi i sibaleni 'eba luku Yaubada 'waineye.

³⁹ Tolugavia 'adi to'edakumeta Iesu 'ana 'ai lagalagana lilivaneye i tovoivoi, i nogai Iesu yana vegole wata i 'iseni bani'odi i munega i wafa nika i ve'awamogitana i vo, Vona mogitana, taunina Yaubada Natuna."

⁴⁰ ✧ Wata 'ifwaidi vevine 'ani'ieyega i 'isanago 'ai lagalagana 'waineye. Vevinenidi 'waidiega, Meli 'atamana Magidala 'wainega wata tamu Meli, Iosese ma taina Iemesa Siaina inadi, wata Salome.

⁴¹ Vevinenidi 'adi 'aitonu Iesu 'ana to'aivaita tutuyanina i folofolova Galili. Wata 'ifwaidi vevine

✧ **15:34:** Same 22:1 ✧ **15:36:** Same 69:21 ✧ **15:38:** Sou 26:31-33; Ibu 10:19-20 ✧ **15:40:** Luk 8:2-3

Iesu taiadi i maia Ielusalema 'waineye, taunidi wata ma fueidi i 'isanago.

Iesu 'ana ve'ufa.

⁴²⁻⁴³ 'Akonadi i lavia Iosefa tomogo Alimadia i le'wa. Taunina tamu me Diu yadi Kaniselo, tomotoga fueidi i ve'ililibuyeni, wata Yaubada yana veimea yana mai fwayefwayeye i lulukamaseni. 'Aiatanina 'waineye Iesu i wafaga Diu yadi 'Aiata 'Idewadewa, we'e 'awa'awai yadi tafalolo. Faifainanina Iosefa ma yana venuafoufa'ala i nago Failato 'waineye Iesu tomogona faifaina i velu'ui. ⁴⁴ Tutuyanina Iosefa yana velu'ui i nogai Failato nuana i vogani i vo, 'Akonadi i wafa?" Begaidi vona i vetunei tolu-gavia 'adi to'edakumeta 'waineye i mai i velu-tolieni i vo, Iesu 'akonadi i wafa?" ⁴⁵ Tutuyanina Failato i 'asetai 'akonadi Iesu i wafa i tauyeni Iesu i na ta'ia. ⁴⁶ Bega Iosefa i nago kaleko 'avu'avuna i kimwanei mulieta Iesu tomogona i ta'ia kalekonina 'wainega i fania, i 'a'avana taumata 'waineye i silukuveni. Taumatanina basenadi i ala-vagaseni matumatu 'waineye bei Iesu i silukuveni, kileu bababanega i vetubodai. ⁴⁷ Vevine 'adi 'ailuga matadie Iesu i ve'ufai, Meli 'atamana Magidala 'wainega, wata tamu Meli Iosese inana.

16

Iesu i tovoi-vaitugana wafayega.

¹ Inala i simwanuya nika me Diu yadi 'Aiata Veawai i 'a'ava, begaidi vevine 'adi 'aitonu i nagoi

bunama magaina 'atumaina i kimwanei Iesu tomogona faifaina. Vevinenidi Meli 'atamana Magidala 'wainega, wata tamu Meli Iemesa inana, wata Salome. ² Tafalolo wiki 'ana 'aiata 'eba velamu 'waineye, i 'atai 'awa'awaiogose inala be'ama i vulaoga, vevinenidi i tovoi i nagoi taumaseye. ³⁻⁴ I nunagoi 'edeeye 'aise'avadi i vonavona i vo, Aitoi kileu bwaikaotogina i na ketoi taumata 'awanega?" Siwe i 'isanago i 'iseni kileu ketoketona. ⁵ Vevinenidi i maia i luku taumata nageneye tamu tubuau i 'iseni ma 'ana talauma 'avu'avuna 'atagiega i miabui nika i kololo 'afo'afo. ⁶⁻⁷ ✧Tubuaunina i vonedi i vo, Kebu 'wa na kolologa, a 'asetami Iesu tomogo Nasaledi bagase i tutufwaseniga 'ai lagalagana 'waineye 'wa lulualeni siwe 'akonadi i tovoi-vaitugana. De'e bei kebu i da miamiaga. 'Wa 'iseni 'ana 'ivi'ava. We'e 'omi 'wa na nagoi yana tovetu-tuyamavo wata Fita taiadi 'wa na vonedi 'wa na vo, Iesu i kumekumeta 'awalawa Galili, 'omi bei 'wa na nagoi 'wa na veluagai, basenadi i vone-miga bani'odi." ⁸ Vevinenidi i nogayeni taumatayega i souyedi i dega ma yadi tatava wata ma yadi nuavogana. Kebu tamu aitoi 'waineye i da lu'ivonaga fai i kololo.

Iesu yana souyagi Meli 'waineye.

[⁹ ✧Tutuyanina Iesu i tovoi-vaitugana 'awa'awaiogose wiki 'ana 'aiata 'eba velamu 'waineye nagami i souyeni Meli 'atamana Magidala 'wainega 'waineye. Vavinenina basenadi yaiaina 7 i agei siwe Iesu i vona i

'awa'a'ia. ¹⁰⁻¹¹ I 'iseni i 'a'avana, i mimai enavo i na vonedi siwe i le'wa i 'isedi i vevemogai. I vonedi i vo, 'Wa ve'wada, Iesu 'akonadi i tovoi-vaitugana, yau taiadi a veluaga.” I nogai siwe kebu i da ve'awamogitana.

Iesu yana tovetutuyamavo 'adi 'ailuga taiadi i veluaga.

¹² Mulieta Iesu yana tovetutuyamavo 'adi 'ailuga i nunagoi wala'aiamo, 'edeye Iesu i souyeni 'ana 'isa tulina. ¹³ I 'iseni wata taiadi i veifufu, mulieta i viladi 'ifwaidi ediavo 'waidie i lu'ivona siwe taunidi wata kebu i da vetumaganediga.

Iesu yana tovetutuyamavo yadi folova i veledi.

¹⁴ Tamu 'aiata Iesu yana tovetutuyamavo 11 i 'ani'ani 'awasasadie Iesu i souyeni i vonedi i vo, Awale nuami i 'amalakibu? Egavo i 'iseku a tovoi-vaitugana siwe yadi vona kebu 'wa da vetumaganedi.”

¹⁵⁻¹⁶ ✧ Wata i vonedi i vo, 'Wa na nagoi tomia fwayafwaya matatabuna 'waidie, Vala 'Atumaina faifaiku 'wa na lu'ivona 'waidie. 'Ai'edi aitoi ma yana vetumagana taunina i na tauyeni 'waikuye i na bafitaiso, Yaubada i na 'ita'ita'ieni. We'e 'ai'edi aitoi kebu i na vetumaganeku, Yaubada i na veimea vematavuloga i na veluagai. ¹⁷⁻¹⁸ ✧ 'Ai'edi egavo i na vetumaganeku veimea a na veledi, bega 'eba 'isa toketokedi i na 'i'idewadi tomotoga fuedi i na 'isedi nika Valaku i na vetumaganeni. 'Aku wagavayega tovetumagananidi i na vona

✧ **16:15-16:** Fol 1:8; Fol 2:38, 16:31-33 ✧ **16:17-18:** Fol 2:4, 8:7, 28:3-6; Luk 10:19

yaiaina 'waidie i na 'awa'a'idi wata 'adi fata i na vonavona bonanidi basenadi kebu i da 'asetadiga 'waidiega. Wata 'ai'edi 'o'olo kasikasisidi i na 'abitonovidi, kebu i na o'vadiga, wata 'ai'edi aitoi ufa kasikasisidi* i na veyemudi, kebu i na wafaga. We'e tovigā i na 'abitonovidi i na ve'atumai.”

Iesu i laka abame.

¹⁹ ✧ Iesu yana veifufu i 'a'ava tovetutuyamavo 'waidie, mulieta Yaubada i vagavaia i laka abame ma yana veimea 'ana 'atagiega i miabui.

²⁰ ✧ 'Akonadi Iesu i 'iawedi tovetutuyamavo i yavula 'atamana matatabuna 'waidie i lau'age. Yadi 'Auvea yana toketokena 'wainega i folofolova bega yadi folova ma 'adi 'eba 'isa toketokedi, tomotoga fuedi i 'isedi i ve'awamogitana yadi lau'age faifaiddi.]

* **16:17-18:** Ufa kasikasisidi bani'odi tuva. ✧ **16:19:** Fol 2:33-34; Efe 1:20 ✧ **16:20:** Fol 14:3; Ibu 2:3-4

YAUBADA YANA VONA'AWAUFUFA 'IVAUNA
The New Testament in the Iamalele Language of Papua
New Guinea

Nupela Testamen long tokples Iamalele long Niugini

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files dated 9 Oct 2020

db771331-f438-5051-a7d5-80ea6197c078